

Carta Sa I Tyaa Ra San Pablo Sii Ñiyiví Sino Iñi Sii Ra Ndyoo Ñuu Roma

I tyaa ra Pablo carta ya sii ñiyiví sino iñi sii ra Ndyoo ñuu Roma

¹ Yuhvi ra Pablo tasi carta ya sii ndo. Minoo muzo ra Jesucristo cui. I casi ra Jesucristo sii, ta i saha ra tyiño sii vatyi cui minoo ra sa cua zacoto Tuhun Vaha ra sii ñiyiví, cuhva cacu ñu.

² Ta ihya Tuhun Vaha cuu zuun ñi tuhun sa i catyi ra Ndyoo ta sa naha vatyi cua quisi si. I cahan ra Ndyoo sa cuenda si quiví i cahan ra profeta ta sa naha.

³ Cuenda zehe ra Ndyoo cuu tuhun ya. I zacacu minoo ñaha sii ra cuhva cacu maa yo. Ta ñiyiví ra rey David i cuu sii ra.

⁴ Ta i sihi ra Jesús, ta i zanandoto ra Ndyoo sii ra. Ta cuhva cuan i zavaha ra Ndyoo minoo sa cahnu xaan, ta i zañaha ra vatyi zehe ra cuu sii ra Jesús. Ta ii xaan cuu ra Jesús, ra ndyaca ñaha sii yo, tañi ii maa ra Ndyoo.

⁵ Sa cuenda ra Jesús i cundahvi iñi ra Ndyoo sii, ta i saha ra tyiño sii sa zacote Tuhun ra. Ta tacuan ta cua sino iñi ñiyiví sa yiví ñiyiví hebreo cuu, ta cua tyaa ñu yahvi. Ta cua zacahnu ñu sii ra Jesucristo.

⁶ Ta zuun ñi ñiyiví cuan cuu tucu maa ndo. I casi ra Ndyoo sii ndo vatyi cuu ndo ñiyiví sii ra Jesucristo.

⁷ Tyei carta ya sii maa ndo, ra sino iñi ñuu Roma. Cuñi xaan ra Ndyoo sii ndo, ta i casi ra sii ndo vatyí cuu ndo ñiyívi ra. Cuñi vatyí nacundahvi xaan ca iñi ra Ndyoo ta ra Jesucristo sii ndo, ta nacuhva ra sa coo sa taxi añima ndo. Ta ra Jesucristo, cuu ra ndyaca ñaha sii yo.

Cuñi ra Pablo cuhun ra ñuu Roma

⁸ Sa xihna ñi sehi tyahvi ndyoo sii ra Ndyoo, ra zacahni. Sehi tyahvi ndyoo sii ra sa cuenda sa i zavaha ra Jesucristo ta vityi sino iñi tandihí ndo. Ta cuhva sa sino xaan iñi maa ndo, sa sito ñiyívi nacahnu cuhva sino iñi ndo.

⁹ Muzu maa ra Ndyoo cui. Tyaa xein yahvi sii ra sihin tandihí cuii añime, ta zacote Tuhun ra sa cuenda Zehe ra. Ta sito vaha ra vatyí ña zañe sa quehin sihin ra cuenda ndo.

¹⁰ Ta sique sii ra vatyí tatu cuñi maa ra, nacuhva ra vatyí cuhin cundyehi sii ndo. Sa naha xaan cuñi ndyehi sii ndo, ta ñá cuu.

¹¹ Cuñi xein cuhin nu yucu ndo, ta cua nacatyí que Tuhun Ndyoo sihin ndo, ta cua sino ca iñi ndo.

¹² Cuñi cuhve tundyee iñi sii ndo, ta cua cuhva tucu maa ndo tundyee iñi sii. Cua tyindyee tahan yo sii yo sihin cuhva sino iñi yo sii maa ra Ndyoo.

¹³ Cuñi sa coto ndo yañi xaa vatyí sa cuaha xaan saha cuñi cuhin nu yucu ndo, zoco ndya vityí ta ña cuu cuhin. Cuñi cuhin vatyí cuñi zacote Tuhun Ndyoo nu yucu ndo, ta cua sino ca iñi ndo, ta cua nducuaha ca ndoho ra sino iñi sa yívi ñiyívi hebreo cuu.

¹⁴ Ñiñi xaan cuñi si zacote sii ñiyívi cahan zahan griego ta ñiyívi ña cahan zahan griego ta sihin ñiyívi sito ta ñiyívi ña cuaha sito.

15 Cuñi si sa zacote sii tandihĩ ñiyivĩ, ta yucuan cuenda cuñi xein zacote sii maa ndo, ra ndyaa ñuu Roma.

Iyo xaan tundyee iñi sihin Tuhun Vaha ra Ndyoo

16 Ña cahan nui sa cuenda Tuhun Vaha ra Ndyoo vatyi kuhva cuu si sii maa ra Ndyoo, ta cua zacacu si sii yoo ra sino iñi. Sa xihna ñi i saa si nu iyo ñiyivĩ hebreo, ta cuee ca i saa si nu iyo inga ñiyivĩ.

17 Vatyi kuhva zacacu ra Ndyoo sii ñiyivĩ zañaha si vatyi zandasi ra cuatyĩ ñu ta zanduvaha ra añima ñu sihin sa sino iñi ñu sii ra. Tañi kuhva catyi Tuhun Ndyoo: “Minoo ra sa zanduvaha ra Ndyoo añima, cua cundito ra tandihĩ cuii tyiemvu vatyi i sino iñi ra.”

Iyo xaan cuatyĩ ñiyivĩ ñuu ñiyivĩ

18 Zoco cuxaan xaan ra Ndyoo sa cuenda cuatyĩ ñiyivĩ, ta cua tasi tuñi ra sii ñu sa cuenda tandihĩ sa ña vaha zavaha ñu. Cuaha xaan cuatyĩ ñiyivĩ iyo, ta cuatyĩ ñu cuan cuu ta ña cuu sino iñi inga ñiyivĩ.

19 Ta kuhva cuu coto ñiyivĩ kuhva iyo ra Ndyoo, casi xaan iyo si vatyi i zañaha maa ra sii yo, ta sa sito ñiyivĩ.

20 Ndyo ta sino ñuu ñiyivĩ ta casi xaan cuu ndyehe ñiyivĩ kuhva iyo ra Ndyoo. Tandihĩ sa i zavaha ra zañaha si vatyi iyo xaan kuhva sii ra, ta cuaha xaan ca sa siñi tuñi iyo sii maa ra ta ziqui sii maa yo. Ndyoo cuu ra sa ndisa. Ta sito ñiyivĩ vatyi iyo ra Ndyoo vazuu ña cuu ndyehe yo sii ra. Zoco cuu sino iñi yo sii ra. Yucuan cuenda ma cuu catyi ñiyivĩ sa ndisa vatyi ña sito ñu ñaa sa cuu sa vaha.

21 Sa i sito ñiyivĩ vatyi iyo ra Ndyoo, zoco ñá cuñi ñu zacahnu ñu sii ra tañi tahan si zacahnu yo sii ra.

Ta ñá saha ñu tyahvi ndyoo sii ra. I quisaha sica iñi ñu tuhun sa ña ñiñi, ta i naa sa siñi tuñi vaha sii ñu.

²² Catyi ñu vatyí sa cuaha xaan i cutuhva ñu ta siñi tuñi xaan ñu, catyi ñu, zoco i nduu ñu ñiyivi ñá sito yozo caa iyo ra Ndyoo.

²³ Ñá zacahnu ca ñu sii sa minoo ñi Ndyoo, ra ndito tandihí cuii tyiemvu, ra Ndyoo ra ndisi xaan ta tyaqui xaan. Zoco i zavaha ñu ndyoo sa cua zacahnu ñu, ta caa si cuhva caa ñiyivi a cuhva caa zaa a quití a cuhva caa coo.

²⁴ Yucuan cuenda i zaña ra Ndyoo sii ñu, ta i zavaha ñu tandihí cuii sa ña vaha sa cuñi añima ñu. I zavaha ñu cuatyí zuun ñi sihin tahan ñu.

²⁵ I zaña ñu sii sa ndisa sa cuenda ra Ndyoo, ta cuñi ca ñu sii inga ndyoo sa yivi Ndyoo sa ndisa cuii. Ta inga tucu cuhva vatyí i zacahnu ñu ta i tyaa ca ñu yahvi sii sa zavaha ra Ndyoo ta ziquí sii maa ra vazú maa ra i zavaha tandihí cuii. Ta tahan si zacahnu yo sii ra tandihí cuii cuhva. Ta nacuu si tacuan, ta nacuu si sa ndisa.

²⁶ Yucuan cuenda i zaña ra Ndyoo sii ñu, ta i zavaha ñu tandihí cuii cuhva ña vaha. I zandoo ñu cuhva vaha sa coo minoo rayí sihin minoo ñi ñaha. Ta i zama ñu inga cuhva, minoo cuhva ña vaha. I zavaha ñu zihí sa ña vaha sihin inga ñu zihí,

²⁷ ta tacuan tucu i zavaha rayí sihin inga rayí. I zandoo ra cuhva tahan si coo ra sihin ñu zihí, ta i zavaha ra sii si sihin inga rayí. Ta sihin coño ñuhu ra tasi tuñi ra Ndyoo sii ra vatyí cahnu xaan cuatyí ra.

²⁸ Ñá cuñi ca ñiyivi nacohon iñi ñu sii ra Ndyoo a tyaa ñu yahvi sii ra. Ta yucuan cuenda i zaña ra Ndyoo sii ñu ta saha ra sa coo minoo sa siñi tuñi ña

vaha sii ñu, ta ziqui i zavaha ñu tandihi cuii sa ña vaha.

²⁹ Ta i situ cuii sa quiñi caa sii ñu sa cuenda tandihi cuii kuhva ña vaha i zavaha ñu. Quihin rayi sii ñu zih i ta ña tandaha ra sihin ñu. Tandih i cuii kuhva ña vaha zavaha ñu. Ndyiyo iñi ñu ndaha tyiño inga ñiyivi. Ñahñi sa ndoo iyo sii ñu. Cuxaan ñu tatu iyo sa vaha sii inga ñiyivi. Sahñi ñu ñiyivi. Nducu ñu tizih i. Zandavi ñaha ñu. Quiñi xaan iyo ñu. Cahan ñu ndya vaha ñi sii inga ñiyivi zoco xehe ñi.

³⁰ Quiñi cahan ñu sii ñiyivi vazu ña ndisa. Cuxaan xaan ñu sihin ra Ndyoo. Cahan ñu ndya vaha ñi sihin ñiyivi. Zacahnu xaan ñu sii ñu, ta catyi ñu vaty i vaha xaan ñu. Cuaha xaan kuhva ña vaha tava ñu. Ña tyaa ñu yahvi sii zutu ñu ta sii zih i ñu.

³¹ Ñahñi sa siñi tuñi vaha iyo xiñi ñu vaty i ña cutuñi iñi ñu ñaa sa cuu sa vaha. Saha ñu tuhun ta ña tyaa ñu yahvi sii si. Ña cuñi ñu nu sii ñiyivi sii ñu. Cuxaan ñu sihin ñiyivi, ta ma zaha ñu tucahnu iñi sii ñu. Ta ña cundahvi iñi ñu sii ñiyivi.

³² Sito vaha ñu kuhva i catyi maa ra Ndyoo vaty i tahan si sa cuu cuii ñiyivi zavaha kuhva ña vaha cuan. Zoco zavaha ñu sii si. Ta ña tacuan ñi, ndya kuhva cuzi xaan iñi ñu tatu zavaha tucu inga ñiyivi sii si.

2

Cua tasi tuñi ra Ndyoo sii ñiyivi kuhva iyo ñu

¹ Yucuan cuenda yoho, yoo ra cuun, tatu ndyehe xoon tatu zavaha inga ñiyivi sa vaha a sa ña vaha, zuun ñi ziqui moo cua ndoo cuaty i, ta ma zandasi

ra Ndyoo cuatyun. Vatyí tyicuhvon sii inga ñiyívi, ta zuun ñi cuatyí zavaha ñu, zavohon.

² Ta sito yo vatyí tasi tuñi ra Ndyoo sihin minoo cuhva ndoo sii ñiyívi zavaha cuhva cuan.

³ ¿Atu sica iñun vatyí cuu tyicuhvon sii ñiyívi? Ta zuun ñi cuhva ña vaha zavaha ñu zavaha tucu moo. ¿Atu sica iñun vatyí ma tasi tuñi ra Ndyoo suun?

⁴ Ndyee xaan iñi ra Ndyoo sihin ñiyívi, ta cundahvi xaan iñi ra sii ñu. ¿Atu sica iñun vatyí yucuan cuenda ma tasi tuñi ra suun? Tatu tacuan sica iñun, ña cutuñi iñun vatyí cuñi ra Ndyoo sa cua zandoon cuatyun, ta yucuan cuenda cundahvi iñi ra suun.

⁵ Ta cuenda sa ndava xaan iñun ta ña cuñun zandoon cuatyun, ta yucuan cuenda zanducahnu con cuatyun, ta cua cuxaan xaan ra Ndyoo suhun quívi cua tasi tuñi ra sii ñiyívi sihin minoo cuhva ndoo ta cua cuhva ra tundoho ndyehe ñu.

⁶ Quiívi cuan cua cuhva maa ra Ndyoo sii sa minoo minoo ñiyívi cuhva tahan si sii ñu sa cuenda tyiño i zavaha ñu.

⁷ Ñiyívi ña zaña sa zavaha sa vaha, cuñi ñu vatyí cua cuzi iñi ra Ndyoo sihin ñu. Ta cuñi ñu vatyí catyí ra vatyí vaha zavaha ñu. Ta nducu ñu cuhva ñihi ñu sa cundito ñu tandihi cuii tyiemvu. Sii maa ñu cuan cua cuhva ra sa cundito ñu.

⁸ Zoco ñihi xaan cua tasi tuñi ra Ndyoo sii ñiyívi ña tyaa yahvi sii maa ra ta sii sa ndisa. Zavaha ñu sa ña vaha. Yucuan cuenda ñihi xaan cua tasi tuñi ra sii ñu cuhva tahan si sii ñu.

⁹ Cua coo xaan tucuihya iñi ta tundoho sii ñiyívi zavaha sa ña vaha, xihna ca sii ñiyívi hebreo ta ziqui sii tandihi inga ñiyívi.

10 Ta cua cuzi# xaan iñi ra sihin ñiyivi zavaha sa vaha, ta cua catyi ra vatyi vaha zavaha ñu. Ta cua coo sa taxi ñi sii ñu sihin ra, ta ma caca xaan ca iñi ñu. Sa xihna ñi cua cuhva ra cuhva ya sii ñiyivi hebreo ta ziqui sii tandihi inga ñiyivi.

11 Tacuan cua zavaha ra vatyi minoo cuhva ndoo zavaha ra Ndyoo, ta cua cuhva ra cuhva tahan si sii sa minoo minoo yo.

12 Tandihi ñiyivi zavaha cuatyi ta ña sito ñu tuhun i saha ra Ndyoo sii ra Moisés, cua cuu ñu zoco yivi sa cuenda tuhun i saha ra Ndyoo sii ra Moisés. Ta ñiyivi sa sito tuhun i saha ra Ndyoo sii ra Moisés ta zavaha ñu sa ña vaha, cua tasi tuñi ra Ndyoo sii ñu cuhva catyi tuhun i saha ra sii ra Moisés.

13 Vaty yivi ñiyivi sa siñi ñi Tuhun Ndyoo cuu ñu cua quita vaha ityi nuu maa ra. Ñiyivi zavaha cuhva catyi Tuhun ra cuu ñu cua catyi ra vaty ñahñi cuatyi ñu.

14 Iyo ñiyivi sa ña sito tuhun i saha ra Ndyoo sii ra Moisés, zoco zuun ñi zavaha ñu cuhva catyi si vazú ña sito ñu vaty iyo si. Sa siñi tuñi vaha sii ñu cuu sa catyi sihin ñu ñaa sa cuu sa vaha vazú ña sito ñu tuhun i saha ra Ndyoo.

15 Zoco zañaha ñu vaty iyo si aña ñu. Inuu ñi cahan sa siñi tuñi vaha sii ñu sihin ñu tañi cuhva catyi Tuhun i saha ra Ndyoo. Ta tyaa sa siñi tuñi vaha sii ñu cuatyi sata ñu a catyi si sihin ñu vaty vaha cuu cuhva zavaha ñu.

16 Ta tacuan cua cuu si quivi cua cuhva ra Ndyoo tyiño sii ra Jesucristo sa cua tyicuhva ra sii ñu, ta cua ndyehe ra tatu zavaha ñu sa vaha a sa ña vaha. Sa i zacote cuhva ya sii ndo quivi i nacaty Tuhun

Vaha ra sihin ndo. Vazu xehe xaan zavaha ñiyivi sa ña vaha a cuenda sa sica ñi iñi ñu, zoco sito ra Ndyoo, ta cua tyicuhva ra Jesucristo sii ñu.

Tyaa ñiyivi hebreo yahvi tuhun i saha ra Ndyoo sii ra Moisés

¹⁷ Catyi ndo vatyí ñiyivi hebreo cuu ndo. Ta ndisa. Ta catyi ndo vatyí tyaa xaan ndo yahvi tandihí tuhun i saha ra Ndyoo sii ra Moisés vatyí tacuan ta cua cacu ndo cuñi ndo. Ta zacahnu ndo sii ndo vatyí maa ñi maa ndo zacahnu sii ra Ndyoo sa ndisa, catyi ndo.

¹⁸ Ta catyi ndo vatyí sito ndo cuhva cuñi maa ra. Ta sito ndo ñaa sa cuu sa vaha xaan vatyí sito ndo tuhun i saha ra. Catyi ndo.

¹⁹ Sica iñi ndo vatyí cuu zaquihin ityi vaha ndo sii ñiyivi ña sito. Ta sica iñi ndo vatyí cuu ndo tañi minoo ñúhu ndisi zandisi sii ñiyivi sica noo nu ñaa.

²⁰ Cuu zacuaha ndo sii ñiyivi ña sito sa vaha, cuñi ndo, ta zaquihin ityi vaha ndo sii ñu tañi sa ndyihí cuu ñu vatyí sihin tuhun i saha ra Ndyoo sii ra Moisés ta sa sito ndo tandihí cuii sa vaha ta sa ndisa, catyi ndo.

²¹ Zacuaha ndo sii inga ñiyivi, zoco ta cutuhva ca maa ndo. Zacuaha xaan ndo sii ñiyivi vatyí ma zuhu ñu, zoco zuun ñi maa ndo zuhu ndo. ¿Atu ña ndisa?

²² Catyi ndo vatyí ña vaha cua cuzu minoo rayí sihin minoo ñaha tatu yivi ñazihí ra cuu, zoco zavaha ndo cuhva cuan. ¿Atu ña tacuan? Cuxaan ndo tatu zacahnu ñiyivi zandu yutu, zoco zuhu ndo ndaha tyiño nu iyo vehe ñuhu si.

²³ Vaha xaan ñiyivi cuu maa ndo vatyí tyaa ndo yahvi tuhun i saha ra Ndyoo sii ra Moisés, catyi

ndo. Zoco ña tyaa ndo yahvi sii si sa ndisa cuii, ta sihin cuhva cuan ña zacahnu ndo sii ra Ndyoo.

²⁴ Tañi catyi Tuhun Ndyoo: “Ñiyivi sa yivi ñiyivi hebreo cuu, cahan ñu ndya vaha ñi sii ra Ndyoo sa cuenda sa ña vaha sa zavaha maa ndo.”

²⁵ Tatu ndisa cuii vatyi zavaha ndo cuhva catyi tuhun i saha ra Ndyoo sii ra Moisés, tyindyee si sa tyaa ndo yahvi costumbre sa tahndya ñi xiñi xuu lee. Zoco tatu ña tyaa ndo yahvi tandihi tuhun i saha ra Ndyoo, yivi ñiyivi ra cuu sii ndo. Ñahñi tyindyee si sa tyaa ndo yahvi sii costumbre cuan. Tañi minoo zeña ñi cuu si vatyi ñiyivi cuenda ra Ndyoo cuu sii ndo, zoco yivi.

²⁶ Ta ñiyivi tyaa yahvi sa ndisa tuhun i saha ra Ndyoo sii ra Moisés, vazu ña tyaa ñu yahvi costumbre cuan, zoco zuun ñi cua tin cuenda ra Ndyoo sii ñu tañi tatu zavaha ñu sii si.

²⁷ Vazu ña zavaha ñu costumbre cuan, zoco tyaa ñu yahvi sii tuhun i saha ra Ndyoo. Maa ñu cuu ñu cua zañaha sii maa ndo vatyi iyo cuatyí ndo. Vatyí maa ndo i ñihi ndo tuhun i saha ra Ndyoo sii ra Moisés ta zavaha ndo costumbre cuan, zoco ña tyaa ndo yahvi cuhva catyi tuhun i saha ra Ndyoo sa ndisa.

²⁸ Vazu ñiyivi hebreo cuu ndo zoco ña cuñi si catyi si vatyí ñiyivi cuenda ra Ndyoo cuu sii ndo sa ndisa. Ta costumbre sa tahndya ñi xiñi xuu lee, ña zatyíño si maa ñi sa cuenda coño ñuhu ñiyivi.

²⁹ Zoco ñiyivi sa cuu ñiyivi hebreo sa ndisa cuii cuu ñu sa zama cuhva iyo ñu ndya aña ñu. Tyaa ñu yahvi tuhun i saha ra Ndyoo, ta zavaha tucu ñu costumbre cuan vatyí cuñi ñu zañaha ñu vatyí zehe ra Ndyoo cuu sii ñu sa ndisa. Ta vazu ma zacahnu

ñiyivi sii ñu cuhva cuan, zoco cua catyi ra Ndyoo vatyi vaha ñu.

3

¹ ¿Atu vaha ca sa cuu yo ñiyivi hebreo? ¿Atu tyindyee costumbre circuncisión cuan sii yo?

² Iyo cuaha xaan cuhva tyindyee si sa cuu yo ñiyivi hebreo, ta sa ñiñi ca cuu sa saha maa ra Ndyoo tandihi tuhun ra sii ñiyivi sahnun sii yo.

³⁻⁴ Vazu cuaha xaan ra hebreo ña sino iñi cuhva catyi ra Ndyoo, zoco zuun ñi cua zavaha maa ra Ndyoo cuhva catyi ra. Vazu catyi tandihi cuii ñiyivi vatyi ma zavaha ra cuhva catyi ra, zoco cua zavaha ra sii si. Tañi catyi si nuu tutu ra Ndyoo: “Cua ndyehe ñiyivi vatyi tuhun cohon cuu sa ndisa, ta cua coto ñu vatyi ra cahan sa ndisa cuun.”

⁵ Ta vityi cua quehin cuhva cahan ñiyivi. Catyi ñu vatyi vaha xaan ca sa zavaha yo sa ña vaha, ta sihin cuhva cuan zañaha si vatyi vaha xaan ca cuu ra Ndyoo. Ta catyi ñu vatyi ña vaha sa tasi tuñi ra Ndyoo sii yo vatyi tyindyee si sii ra sa zavaha yo sa ña vaha vatyi zañaha si vatyi vaha xaan maa ra, catyi ñu.

⁶ Zoco ña ndisa sa tacuan vatyi tatu tacuan cuu si, ma tyicuhva ra Ndyoo sii ñiyivi ñuu ñiyivi.

⁷ Tatu sica iñi yo vatyi vaha ca sa cuvarya yo ta ziqui cua coto ñiyivi vatyi ndisa xaan cuu tuhun cahan maa ra Ndyoo ta cua zacahnu ca ñu sii ra. Zoco ña tacuan cuñi si vatyi tatu tacuan sica iñi yo, ma cutuñi iñi yo ñaa cuenda cua tyicuhva ra Ndyoo sii yo tañi ñiyivi iyo cuaty.

⁸ Iyo ñiyiví catyi ñu: “Nazavaha ca yo sa ña vaha ta cua zañaha si vatyí vaha xaan ca ra Ndyoo vatyí cuaha xaan cuatyí yo cua zandasi ra.” Ta catyi ñiyiví cahan ndya vaha ñi sii maa yo vatyí zuun ñi cuhva cuan zacuaha yo, catyi ñu. Ñihi xaan cua zandyehe ra Ndyoo tundoho sii ñiyiví cahan cuhva cuan vatyí tacuan tahan si sii ñu.

Iyo cuatyí sii tandihí cuii yo

⁹ Ta yozo caa ¿atu vaha ca cuu maa yo ñiyiví hebreo ta ziquí inga ñiyiví? Ña ndisa. Sa nacatyí ndi sihin ndo vatyí iyo cuatyí sii tandihí cuii ñiyiví. Iyo cuatyí sii ñiyiví hebreo ta sii ñiyiví sa yiví ñiyiví hebreo cuu.

¹⁰ Tañi catyi Tuhun ra Ndyoo:

Yoñi minoo ñiyiví vaha sa ndisa cuii, numinoo.

¹¹ Yoñi minoo ñu sa cutuñi iñi.

Yoñi maa nanducu sii ra Ndyoo.

¹² Tandihí cuii ñu i naa iñi ñu sii ra Ndyoo.

I zandoo ñu ityi ra, ta ñahñi minoo cuhva vaha zavaha ñu sa cuenda ra Ndyoo.

Numinoo ñu ña zavaha sa vaha, yoñi maa.

¹³ Quiñi xaan cahan ñu, ta vatyá xaan ñu sihin yuhu ñu.

Cuu si minoo xico iñi xaan sahan sa quita sisi ñaña sa tacoho yuhu.

¹⁴ Cahan ñu ndya vaha ñi sihin ñiyiví.

Ta quiñi xaan cahan ñu sii ñu.

¹⁵ Yatyí xaan cua cahñi ñu ñiyiví.

¹⁶ Nu yucu ñu saha ñu tundoho, ta saha xaan ñu sa cuihya iñi sii inga ñiyiví.

¹⁷ Ña sito ñu yozo caa zacuu ñu ta coo sa taxi sii ñu sihin ra Ndyoo ta sihin inga ñiyiví.

18 Ta ña yuhu maa ñu sii ra Ndyoo.
Catyi Tuhun ra Ndyoo.

19 Sito yo vatyí tandihí tuhun i saha ra Ndyoo sii ra Moisés, cahan si sa cuenda ñiyívi hebreo. Ta cua coto tandihí ñu vatyí iyo cuatyí ñu nuu ra Ndyoo, ta ma cuu catyi ñu vatyí ñahñi cuatyí ñu. Ta tacuan tucu tandihí ñiyívi ñuu ñiyívi.

20 Yoñi numinoo ñiyívi cua nduvaha aña ityi nuu maa ra Ndyoo sihin sa tyaa xaan ñu yahvi tuhun i saha ra Ndyoo sii ra Moisés vatyí tuhun cuan cuenda zacoto ñi si sii ñu ñaa sa cuu cuatyí ñu.

Ñihi yo sa cacu aña yo sihin sa sino ñi iñi yo sii ra Ndyoo

21 Vityí sito yo vatyí yívi sihin tuhun i saha ra Ndyoo sii ra Moisés ta nduvaha aña yo ityi nuu maa ra. Zuun ñi Testamento Sahnu catyi si cuhva cuan.

22 Vityí zanduvaha ra Ndyoo cuhva iyo ñiyívi sihin sa sino ñi iñi ñu sii ra Jesucristo. Ta inuu cuii ñi tñn cuenda ra sii ñu sino iñi tacuan vazú ñu hebreo a inga ñu vatyí ña zñn ndyehe ra sii yo.

23 Ta iyo cuatyí sii tandihí cuii ñiyívi. Sica xaan ndyaa tandihí yo nuu ra Ndyoo ta sihin cuhva cuñi ra.

24 Zoco i zavaha maa ra Ndyoo minoo tumañi iñi cahnu xaan sii yo sa tyiyahvi ra Jesucristo sa cuenda cuatyí yo. Ta vityí catyi ra Ndyoo vatyí ñahñi ca cuatyí maa yo sa sino iñi sii ra Cristo vatyí i zavaha ra cuhva cuan.

25 I zaquisi ra Ndyoo sii ra Cristo. Ta i ndoho ra. Ta i sihi ra sa cuenda cuatyí maa yo. Ta ma cuxaan ca ra Ndyoo sihin yo tatu sino iñi yo vatyí sati niñi

ra Cristo sa cuenda maa yo. Ta i zandyee xaan ra Ndyoo iñi ra ndyehe ra sii yo, ta ña cañi ra sii yo cuenda cuaty i zavaha yo quivi cumañi ca coto yo Tuhun ra.

²⁶ Ta i zañaha ra vaty vaha xaan ra sihin yo vaty i ndoho ra Cristo sa cuenda cuaty maa yo. Ta yucuan cuenda caty ra Ndyoo vaty ñahñi cuaty iyo sii ñiyivi sino iñi sii ra Jesús.

²⁷ Ihya cuu cuenda sa ma cuu caty yo vaty vaha xaan maa yo. Ma cuu cahan yo tacuan vaty ma nduvaha aña yo ity nuu ra Ndyoo sihin sa zavaha yo sa vaha. Maa ñi sihin sa sino iñi yo sii ra Jesucristo ta nduvaha aña yo nuu ra Ndyoo.

²⁸ Sito ndi vaty caty ra Ndyoo vaty ñahñi cuaty iyo sii minoo ra tatu sino iñi ra sii ra Cristo vazu ña tyaa ra yahvi sii tuhun i saha ra Ndyoo sii ra Moisés.

²⁹ Ndisa vaty zacahnu ñiyivi hebreo sii ra Ndyoo, zoco zacahnu tucu inga ñiyivi sii ra. Zandasi ra Ndyoo cuaty ñiyivi hebreo, ta tacuan tucu sihin inga ñiyivi vaty yivi Ndyoo cuenda ñiyivi hebreo ñi cuu ra. Ndyoo cuu ra sa cuenda tandi ñiyivi.

³⁰ Minoo tuhun ñi ra Ndyoo iyo, ta caty ra vaty ñahñi ca cuaty iyo sii ñiyivi sino iñi sii ra Cristo vazu zavaha ñu costumbre circuncisión cuan a vazu ma zavaha ñu sii si.

³¹ ¿Atu sa cuenda sa sino iñi yo ta caty yo vaty ña ñiñi ca tuhun i saha ra Ndyoo sii ra Moisés? Ma caty yo tacuan. Vityi iyo cuhva sii yo ta cuu tyaa yo yahvi sii si sa ndisa cui vaty tyindyee ra Cristo sii yo.

4

Cuhva i zañaha ra Abraham cuhva i sicoo ra

¹ ¿Ta yozo caa cuu si sa cuenda ra Abraham, ra cu ñiyivi sahnú sii maa yo ñiyivi hebreo? ¿Ñaa cuenda catyi ra Ndyoo vatyi vaha ra Abraham?

² Tatu catyi ra Ndyoo vatyi ñahñi cuatyi ra Abraham vatyi i zavaha ra sa vaha, cuu catyi maa ra Abraham vatyi vaha xaan ra. Zoco ñá cuu catyi ra Abraham tacuan ityi nuu ra Ndyoo.

³ I catyi ra Ndyoo vatyi vaha ra Abraham cuhva catyi Tuhun Ndyoo: “I sino iñi ra Abraham sa catyi ra Ndyoo, ta yucuan cuenda catyi ra Ndyoo vatyi ñahñi cuatyi ra.” Catyi si.

⁴ Minoo ra zatyíño, ña ñihi ra xuhun sa caha ñi. Tyiyahvi ñu sii ra vatyi zatyíño ra.

⁵ Zoco minoo ra ña zatyíño sa cuenda cuhva cacu añima ra zoco sino iñi ra sii ra zandasi cuatyi ñiyivi, sihin sa sino ñi iñi ra cuan ta ñihi ra cuhva catyi ra Ndyoo sihin ra vatyi ñahñi cuatyi ra.

⁶ I catyi tucu ra David vatyi zii xaan cuñi minoo ra tatu catyi ra Ndyoo sihin ra vatyi ñahñi cuatyi ra. Ñahñi sa zavaha ra ta ñihi ra sa tacuan. Tumañi iñi ñi cuu si sa saha maa ra Ndyoo sii ra.

⁷ Ihya cuu cuhva i catyi ra David:
Zii xaan cuñi ñiyivi, ñu i zandasi ra Ndyoo cuatyi.

⁸ Zanaa ra sii si.
Zii xaan cuñi ñiyivi, ñu ña tyaa ca ra Ndyoo cuatyi ziqui.

⁹ Ma cuu catyi yo vatyi maa ñi ñiyivi tyaa yahvi costumbre circuncisión cuu ñu ñihi tumañi iñi cuan sii ra Ndyoo. Zuun ñi cuhva cua ñihi ñiyivi ña tyaa yahvi costumbre cuan. Sihin sa sino ñi iñi

ra Abraham ta catyi ra Ndyoo sihin ra vatyi ñahñi ca cuaty ra.

¹⁰ ¿Ta ama i catyi ra Ndyoo vaty i ñahñi cuaty ra Abraham? ¿Atu sa yaha zavaha ra costumbre circuncisión a cumañi ca? Cumañi ca zavaha ra sii si ta sa i catyi ra Ndyoo sihin ra vaty sa i nduvaha aña ra.

¹¹ Ta ziqui i zavaha ra costumbre cuan tañi minoo zeña vaty sa yaha nduvaha aña ra sihin sa sino iñi ra, cuee ca sa zavaha ra cuhva cuan. Ta ziqui i nduu ra minoo ñiyivi sahnii tandihi ñiyivi sino iñi sii ra Ndyoo ta ña zavaha ñu costumbre cuan. Sa cuenda sa sino ñi iñi ñu ta catyi ra Ndyoo vaty ñahñi ca cuaty ñu.

¹² Ta nduu tucu ra Abraham minoo ñiyivi sahnii ñiyivi zavaha costumbre cuan, zoco tatu maa ñi costumbre cuan zavaha ñu, yivi ñiyivi ra Abraham cuu sii ñu. Nduu ra ñiyivi sii ñu ndyico sii ra sa ndisa sihin cuhva sino xaan iñi ra. Ta sino ndisa cuu iñi ñu cuan sii ra Ndyoo cuee ca sa zavaha ñu costumbre cuan.

Sihin sa sino ñi iñi yo ta ñihi yo tumañi iñi sii ra Ndyoo

¹³ Ndyo ta sa naha i catyi ra Ndyoo sihin ra Abraham vaty maa ra sihin ñiyivi sii ra cua ñihi ñu tandihi ñuu ñiyivi. Ñá ñihi ñu cuhva cuan sihin sa tyaa ñu yahvi sii tuhun i saha ra Ndyoo sii ra Moisés. I ñihi ñu sii si sihin sa sino ñi iñi ñu sii ra Ndyoo vaty zavaha ra cuhva catyi ra. Ta i catyi ra Ndyoo vaty ñahñi cuaty ñu.

¹⁴ Vaty tatu maa ñi ñiyivi tyaa xaan yahvi ley sa saha ra Ndyoo sii ra Moisés cuu ñu cua ñihi ndatu sii ra Ndyoo, tacuan ta ñahñi cua tyindyee si sa

sino iñi yo sii ra Jesucristo, zoco ña tacuan cuu si, vatyi tatu tacuan cuu si, ña zavaha ra Ndyoo cuhva catyi ra sa ndisa.

¹⁵ Sa cuenda tuhun i saha ra Ndyoo sii ra Moisés ta catyi ra Ndyoo vaty iyo cuaty i ñiyivi. Tatu ñahñi sa catyi ñaa sa cuu sa ña vaha, ma cuu tyaa ñiyivi yahvi sii si, ta ma cuu sa ma tyaa ñu yahvi sii si.

¹⁶ Yucuan cuenda sihin sa sino ñi iñi yo ta ñihi yo sa vaha vaty i tacuan ta cuu cuu si minoo tumañi iñi saha maa ra Ndyoo sii yo. I catyi ra Ndyoo sihin ra Abraham vaty i cua ñihi ra minoo sa vaha. Ta i catyi tucu ra Ndyoo vaty i tandihi ñiyivi sino iñi sii ra cua ñihi ñu sa vaha vaty i sino iñi ñu cuhva i sino iñi ra Abraham. Cua cuhva ra Ndyoo sii si sii ñiyivi tyaa xaan yahvi tuhun i saha ra sii ra Moisés tatu sino iñi ñu sii ra Jesucristo. Ta cua cuhva ra sii si sii ñiyivi sino ñi iñi tañi maa ra Abraham. Ta maa ra cuu minoo ñiyivi sahnu sii tandihi cuii yo sa sino iñi.

¹⁷ Catyi tutu ra Ndyoo sa cuenda ra Abraham: “Cuaha xaan zehun cua coo nacahnu ñuu ñiyivi.” Zutu yo cuu sii ra Abraham nuu ra Ndyoo. Sino xaan iñi ra Abraham sii ra Ndyoo. Cuu zanandoto ra Ndyoo sii ñiyivi i sihi. Ta tandihi sa cua cuu ityi nuu ca, cua cuu si vaty i maa ra Ndyoo cua zavaha sii si.

¹⁸ I sino iñi ra Abraham sa cahan ra Ndyoo vazuu ma cuu si cuñi ra, zoco i cuu si. Ta i nduu ra zutu sahnu sii cuaha xaan ñiyivi. Tañi i catyi ra Ndyoo sihin ra: “Tyehen cua nducuaha ñiyivi suun.”

¹⁹ I sito ra Abraham vaty i sa sahnu xaan ra. Sa yaty i minoo ziendu cuiya ra. Sahnu xaan tucu maa ña Sara, ta ma cuu ca coo zehe ña. Zoco ña

siin sino iñi ra Abraham vazu sa sahnu xaan nduu tahan ñu.

²⁰ Ñá sica iñi ra Abraham vatyí ma cuu ca coo zehe ñu, zoco i sino iñi ra tuhun i catyí ra Ndyoo sihin ra. Ñá ndu-uu iñi ra. I zacahnu ra sii ra Ndyoo.

²¹ I sito vaha xaan ra vatyí cuu zacuu ra Ndyoo tandihi sa i catyí ra sihin ra.

²² Yucuan cuenda i catyí ra Ndyoo vatyí ñahñi cuatyí ra Abraham vatyí i sino iñi ra.

²³⁻²⁴ Tacuan i catyí ra Ndyoo sa cuenda ra Abraham. Ta i cahan tucu ra tuhun cuan ndya sa cuenda maa yo. Cua catyí tucu ra vatyí ñahñi cuatyí iyo sii maa yo vatyí sino iñi yo sii ra Ndyoo, ra i zanandoto sii ra Jesús sa i sihi ra. Ta ra Jesús cuu ra ndyaca ñaha sii yo.

²⁵ I sihi ra Jesús sa cuenda cuatyí maa yo. Ta i nandoto ra vatyí tacuan ta cua cuu catyí maa ra Ndyoo vatyí ñahñi ca cuatyí yo iyo.

5

Ñahñi cuatyí cua tyaa ra Ndyoo sata yo

¹ Yucuan cuenda catyí ra Ndyoo vatyí ñahñi ca cuatyí yo vatyí sino iñi yo. Sa iyo sa taxi sii yo sihin ra Ndyoo vityí sa cuenda maa ra Jesucristo.

² Sa cuenda maa ra ñihi yo tumañi iñi sii ra Ndyoo vatyí sino iñi yo. Ñihi xaan yo tumañi iñi sii ra Ndyoo, ta zii xaan cuñi yo. Ta nii cuu iñi yo vatyí cua cuhun yo nu ndyaa ra Ndyoo ta cua nduu yo tañi maa ra.

³ Ta ña tacuan ñi, zoco zii cuñi tucu yo vazu ndyehe yo tundoho vatyí sito yo vatyí tyindyee si

sii yo ta cua coo ca tundyee iñi sii yo tatu cuaha tundoho ndyehe yo.

⁴ Ta tatu iyo tundyee iñi sii yo vaha xaan cuu yo ityi nuu ra Ndyoo. Ta tatu vaha xaan yo nuu ra, ñi xaan cua cuu iñi yo vatyí cua ñihi yo tandíhi sa vaha sa saha maa ra.

⁵ Ta tatu sa cuniñi vaha iñi yo, sito yo vatyí ma zandavi ñaha ra Ndyoo sii yo. Tacuan sito yo vatyí sito yo vatyí cuñi xaan ra Ndyoo sii yo. Ta Tatyí Ii sa saha maa ra sii yo, iyo si añima yo ta zacoto si sii yo vatyí cuñi xaan maa ra Ndyoo sii yo sihin minoo cuhva vaha xaan.

⁶ Ñá cuu zacacu yo sii yo, zoco sa tahan si quiñi sa i catyi ra Ndyoo ta ziqui i quisi ra Cristo. Ta i sihi ra sa cuenda ñiyiñi ña vaha tañi maa yo.

⁷ Sito yo vatyí ma cuu cuu yo sa cuenda ñiyiñi ña vaha. Zoco iyo saha cua cuu minoo ñiyiñi sa cuenda inga ñiyiñi vaha xaan ca.

⁸ Ta maa ra Ndyoo zañaha ra vatyí cuñi xaan ra sii yo vatyí vazú ñiyiñi iyo xaan cuatyí cuu maa yo, zoco i sihi ra Cristo sa cuenda yo.

⁹ Ta vityí sa cuenda niñi ra Cristo ta catyi ra Ndyoo vatyí ñahñi ca cuatyí yo. Sa cuenda ra Cristo i tin cuenda ra Ndyoo sii yo, ta ma zandyehe ra tundoho sii yo quiñi cua cuxaan ra ta cua zandyehe ra tundoho sii ñiyiñi iyo cuatyí, quiñi cua ndíhi ñuu ñiyiñi.

¹⁰ Ta maa yo i cuu ñiyiñi xaan iñi sii ra Ndyoo, zoco i zanduvaha ra sii yo sihin ra quiñi i sihi Zehe ra sa cuenda yo. Ta vityí ndito ra tandíhi cuii tyiemvu, ta sito yo vatyí iyo xaan ca cuhva sa cua zacacu ra sii yo vatyí iyo ra sisi añima yo.

11 Ta ña tacuan ñi. Zi xaan cuñi yo vityi vatyi iyo sa taxi sii yo sihin ra Ndyoo sa cuenda cuhva i zavaha ra Jesucristo, ra ndyaca ñaha sii yo.

Cuhva i zavaha ra Adán ta cuhva i zavaha ra Cristo

12 Sa cuenda minoo ra ta i quihvi cuatyi ñuu ñiyivi. Ta cuenda cuatyi i zavaha ñiyivi, ta i quisaha cuhva sa sihi tandihí ñu vatyi iyo cuatyi sii tandihí yo.

13 Ta sa iyo cuatyi ñuu ñiyivi cumañi ca cuhva ra Ndyoo tuhun ra sii ra Moisés. Ta quivi cumañi ca cuhva ra Ndyoo tuhun ra, ñá tyaa ra cuatyi sata ñiyivi sa minoo minoo cuatyi zavaha ñu vatyi ta coto ca ñu tuhun i saha ra sii ra Moisés.

14 Zoco i sihi ñu ndya quivi i zavaha ra Adán cuatyi cuan ndya cuhva ndya quivi i sicoo ra Moisés vazu ñá zavaha ñu sa zuun ñi cuatyi i zavaha ra Adán. Ta i cuu ra Adán tañi minoo ra sa cua quisi ityi nuu ca.

15 Saha maa ra Ndyoo tumañi iñi sii ñiyivi, ta tucu xaan cuu cuhva i zavaha ra Ndyoo ta ziqui cuhva i zavaha ra Adán. Vatyi sihin sa minoo tuhun ñi cuatyi i zavaha ra Adán ta cuaha xaan ñiyivi i sihi, zoco sihin tumañi iñi sa saha xaan ra Ndyoo ta i zavaha ra Jesucristo minoo cuhva vaha xaan sa cua zanaa ra cuatyi sii cuaha xaan ñiyivi.

16 Tucu ca cuu tumañi iñi sa saha maa ra Ndyoo ta ziqui cuhva i zavaha ra Adán. Minoo ñi cuatyi i zavaha ra cuan, ta yucuan cuenda cua tasi tuñi ra Ndyoo sii tandihí ñiyivi. Zoco vityi sihin tumañi iñi sa saha maa ra Ndyoo ta ña tyaa ca ra cuatyi ziqui ñiyivi vazu cuaha xaan cuatyi ñu.

17 Ndisa vatyí i síhi cuaha xaan ñiyiví sa cuenda sa i zavaha sa minoo tuhun ñi ra Adán. Zoco vityí cuaha xaan ñiyiví cua ñihi tumañi iñi sa saha maa ra Ndyoo, ta cua cundito ñu tandihí cuii tyiemvu. Cua nduvaha añaíma ñu sa cuenda sa zavaha minoo ñi ra, ra Jesucristo.

18 Sa cuenda cuatyí sa i zavaha minoo ñi ra, ta i catyí ra Ndyoo vatyí iyo cuatyí sii tandihí ñiyiví, ta tahan sí sa cuu ñu. Ta zuun ñi cuhva sa cuenda minoo sa vaha sa i zavaha minoo ñi ra ta i catyí ra Ndyoo vatyí ñahñi cuatyí iyo sii tandihí ñiyiví, ta cua cundito ñu tandihí cuii tyiemvu.

19 Sa cuenda sa ñá tyaa minoo ra yahví, ta i nduu tandihí ñiyiví ñiyiví cuatyí. Zoco sa cuenda sa i tyaa inga ra yahví, ta cua tiin cuenda ra Ndyoo sii ñiyiví tañi sa ñahñi ca cuatyí ñu.

20 I saa quiví i saha ra Ndyoo tuhun ra sii ra Moisés, ta i nacoto ñiyiví vatyí cuaha xaan cuatyí ñu. Zoco vazu cuaha xaan cuatyí ñu, zoco vaha xaan añaíma maa ra Ndyoo, ta i saha xaan ca ra tumañi iñi.

21 Sa cuenda cuatyí ñiyiví ta i quisaha síhi ñu. Ndyaca ñaha tuhun síhi sii ñu. Ta vityí sa cuenda sa i zavaha ra Jesucristo, ra ndyaca ñaha sii yo, ta saha ra Ndyoo tumañi iñi sii ñiyiví. Catyí ra vatyí ñahñi ca cuatyí ñu. Yucuan cuenda cua cundito ñu tandihí cuii tyiemvu. Vityí síhin sa saha maa ra Ndyoo tumañi iñi sii yo, ta ña ndyaca ñaha ca tuhun síhi sii yo.

6

Ma zavaha ca yo cuatyí

¹ ¿Atu vaha catyi yo nazavaha ca yo cuatyí vatyi tacuan ta cua cundahvi ca iñi ra Ndyoo sii yo?

² Ña tacuan. Tatu sa i zaña yo cuatyí yo sa ndisa, ma cuu ca zavaha ca yo sii si.

³ I sicoo ndutya yo sa cuenda ra Cristo Jesús, ta sa sicoo ndutya yo cuu tañi sa sihi yo sihin ra Cristo.

⁴ Cuu si tañi sa i sihi yo ta i quihvi coño ñuhu yo sisi ñaña ñin ñi sihin ra nu i sicoo ndutya yo cuenda ra, ta i nandoto yo sihin ra vatyi ñin ñi cuu yo sihin ra. Ta iyo xaan cuhva sii Zutu ra, ta i zanandoto ra sii ra Jesús vatyi tacuan ta nduu maa yo ñiyivi saa ta coo yo minoo cuhva saa.

⁵ Tatu sa ndu-ñin yo sihin ra nu i sihi ra, cua ndu-ñin tucu yo sihin ra inga cuhva, ta cua coo yo minoo cuhva saa sihin ra.

⁶ Sito yo vatyi i ndihí cuhva sa sicoo ityi sata. Ña iyo ca yo cuhva i tyaa yo yahvi sii coño ñuhu yo ta zavaha yo cuhva ña vaha sa cuñi si. Ña tacuan.

⁷ Vatyi maa yo sa i sihi sihin ra Cristo, ñahñi ca cuhva cuu zacuu cuatyí sihin yo. Ma cuu ca cundyaca ñaha si sii yo.

⁸ Ta tatu sa i sihi yo sihin ra Cristo, sino iñi yo vatyi cua cundito tucu yo sihin ra.

⁹ Vatyi sito yo vatyi i nandoto ra Cristo sisi sa i sihi ra, ta ma cuu ca ra. Ma cundyaca ñaha ca tuhun sihi sii maa ra.

¹⁰ Minoo saha ñi i sihi ra sa cuenda cuatyí ñiyivi. Ta vityi ndito ra. Ta iyo ra ñin ñi sihin ra Ndyoo tandihí cuii tyiemvu.

¹¹ Yucuan cuenda maa ndo, zaha ndo tuhun sa i sihi ndo ityi nuu cuatyí cuan vatyi ma cuu ca cundyaca ñaha si sii ndo. Zoco ndito ndo sa cuenda

ra Ndyoo vatyi sa ndu-~~in~~ ndo sihin ra Cristo Jesús, ra ndyaca ñaha sii yo.

¹² Yucuan cuenda ma cuhva ca ndo sa cundyaca ñaha cuatyí cuan sii ndo. Ma tyaa ca ndo yahvi cuhva ña vaha sa cuñi coño ñuhu ndo zavaha si.

¹³ Ma cuhva cuenda ndo coño ñuhu ndo sii cuatyí cuan, ta ma zavaha ndo sa ña vaha. Cuhva ndo sii ndo sii ra Ndyoo vatyi ñiyivi sa i nandoto cuu ndo. Ta zatyiño ndo sa cuenda ra Ndyoo, ta zavaha ndo sa vaha.

¹⁴ Vatyí cuatyí cuan, ñahñi ca sa cuu zacuu si sihin ndo vatyi ña ndyaca ñaha ca tuhun i saha ra Ndyoo sii ra Moisés sii ndo. Ña tacuan ñihi ndo cuhva cacu añima ndo. Vityí ndito ndo sa cuenda tumañi iñi sa saha maa ra Ndyoo sii ndo.

Nacuhva ndo sii ndo sii ra Ndyoo ta zavaha ndo maa ñi sa vaha

¹⁵ Ta yozo caa vityí ¿atu zavaha ca yo cuatyí vatyi ña ndyaca ñaha ca tuhun i saha ra Ndyoo sii ra Moisés sii yo ta vityí saha xaan maa ra Ndyoo tumañi iñi sii yo? Ña tacuan cuñi si.

¹⁶ Sito ndo vatyi tatu nduu ndo muzu sii minoo ñiyivi, tyaa ndo yahvi sa catyi ra. Ta muzu cuu ndo sii ra sa tyaa ndo yahvi. Tatu tyaa ndo yahvi sii cuatyí, cua cuu cuii ndo. A tatu tyaa ndo yahvi sii ra Ndyoo cua catyi ra vatyi sa nduvaha ndo sihin cuhva iyo ndo.

¹⁷ Ityi sata maa ñi cuatyí i zavaha ndo, zoco vityí sehi tyahvi ndyoo sii ra Ndyoo vatyi vityí sihin tandihí cuii añima ndo tyaa ndo yahvi Tuhun Vaha sa i sino iñi ndo.

18 Sa ndasi cuatyí ndo. Ña cuu ca ndo muzu sii cuatyí cuan. Sa i nduu ndo muzu sii sa vaha tañi cuñi ra Ndyoo.

19 Quehin ziqui minoo cuhva vatyí ta coto ca ndo tandihí yozo caa iyo maa ra Ndyoo. Ityí sata i zavaha ndo cuatyí. Maa ñi sa ña vaha i zavaha ndo. Ta quiñi xaan ca nanduu cuhva zavaha ndo. Zoco vityí nacuhva ndo sii ndo sii ra ta zavaha ndo maa ñi sa vaha sa ndisa cuií vatyí cua nduu ndo ñiyívi vaha xaan cuhva cuñi ra Ndyoo.

20 Quiívi sa i cuu ndo muzu sii cuatyí cuan, ñá cuu zavaha ndo sa vaha.

21 ¿Ta ñaa sa vaha ñihi ndo sihin cuhva i zavaha ndo? Ñahñi maa. Ta vityí cucahan nuu ndo sa cuenda sa i zavaha ndo vatyí sa cuenda cuhva ña vaha cuan ta cua ndoho ñiyívi zavaha sii si tandihí cuií tyiemvu.

22 Zoco vityí sa zandasi ra Ndyoo cuatyí ndo, ta ña ndyaca ñaha ca si sii ndo. Ta sa i nduu ndo muzu maa ra Ndyoo. Ta sa ñihi ndo sihin cuhva ya cuu sa nduu ndo ñiyívi vaha. Ta quiívi cua ndihí sa ndito ndo ihya ñuu ñiyívi ya, cua cundito ndo tandihí cuií tyiemvu sihin ra Ndyoo.

23 Tatu zavaha yo sa ña vaha, sa cua ñihi yo sihin cuhva cuan cuu sa cua cuu cuií yo. Zoco tatu tñin cuenda yo sa vaha xaan sa saha maa ra Ndyoo sii yo, cua cundito yo tandihí cuií tyiemvu sihin ra Jesucristo, ra ndyaca ñaha sii yo.

7

Ziqui minoo cuhva, cuhva iyo ñiyívi tatu sa tindaha ñu

¹ Ndoho yañi xaa, sa sito maa ndo tuhun i saha maa ra Ndyoo sii ra Moisés. Ta sito ndo vatyí tatu sa i sihi minoo ñiyívi, ña cuñi ca si sa tyaa ñu yahvi sii si.

²⁻³ Cua quehin ziqui minoo cuhva. Tatu tindaha minoo ñaha sihin minoo rayi, catyi tuhun i saha ra Ndyoo sii ra Moisés vatyí ñazihí ra cuu sii ña ndya quívi cua cuu ra. Nii ñi sa ndito ra ta cua cuu ña minoo ñaha zana tatu cua coo ña sihin inga ra ta ndito ca ra tindaha sihin ña. Zoco tatu sa sihi ra, ña ndyaca ñaha ca tuhun sa tindaha sii ña. Cuu tindaha ña inga saha, ta ma cuu catyi ñiyívi vatyí ñaha zana cuu ña.

⁴ Ta zuun ñi cuhva cuan iyo sihin ndoho yañi xaa. Cuu catyi yo vatyí in ñi cuu ndo sihin ra Cristo. Quívi i sihi ra ta cuu si tañi sa sihi tucu maa yo. Ta yucuan cuenda ña iyo ca ndo cuenda tuhun i saha ra Ndyoo sii ra Moisés. Vityí ñiyívi ra Cristo cuu sii ndo. Maa ra cuu ra i nandoto sisi sa i sihi ra, ta sihin cuhva cuan ta cuu zatyíño vaha ndo tyiño maa ra Ndyoo.

⁵ Quívi sa tañaha ca sino iñi yo sii ra Cristo, cuaha xaan sa ña vaha i zavaha yo. I sito yo cuhva catyi tuhun i saha ra Ndyoo sii ra Moisés vatyí ma zavaha ca yo sa ña vaha, ta yucuan cuenda cuñi ca yo zavaha yo sa ña vaha cuan. Ta sihin cuhva cuan ta cua cuu cuii yo.

⁶ Zoco vityí ña ndyaca ñaha ca tuhun i saha ra Ndyoo sii ra Moisés sii yo vatyí sa i sihi yo sihin ra Cristo, ta i ndihí cuhva cuan sa cuenda maa yo. Ta yucuan cuenda ña iyo ca yo cuhva catyi si nuu tutu, tuhun sahnú. Iyo yo minoo cuhva saa vatyí tyindyee Tatyí Ii maa ra Ndyoo sii yo.

Iyo ca cuatyí yo vazu sa sino iñi yo

⁷ ¿Ta yozo caa vityi? ¿Atu catyi tuhun sahnu vatyí zavaha ca yo cuatyí? ¡Ña catyi si numinoo saha! Zoco vityi site ñaa sa cuu cuatyí sa cuenda tuhun cuan. Catyi si: “Ma ndyíyo iñun ndaha tyiño inga ñiyívi.” Ta yucuan cuenda site vatyí ña vaha zavehi cuhva cuan.

⁸ Tatu sa vatyí ñahñi tuhun cuan, ma cote ñaa sa cuu cuatyí, ta ma cuñi zavehi sii si. Zoco quívi sa site vatyí ña vaha sa ndyíyo iñi yo, ta i cuñi zavehi sii si vatyí iyo cuatyí añime.

⁹ Ta quívi ñá site ñaa sa catyi tuhun i saha ra Ndyoo sii ra Moisés, i sica iñi vatyí vaha ñiyívi cui. Zoco i saa quívi ta i cutuñi iñi cuhva catyi tuhun cuan, ta ziqui i site vatyí iyo cuatyí añime, ta i site vatyí minoo ñiyívi ña vaha cui.

¹⁰ Catyi tuhun cuan vatyí tatu tyaa ñiyívi yahvi sii si cua cundito ñu tandihí cuii tyiemvu. Zoco zuun ñi tuhun cuan cuu sa i zatívi sii, vatyí ñá tyei yahvi sii si. Vatyí catyi si vatyí ra ña tyaa yahvi sii si, tahan si sa cua cuu cuii ra.

¹¹ Ta cuhva sa ña vaha i cuñi zavehi, i zandavi ñaha si sii. Ta cuhva catyi tuhun i saha ra Ndyoo sii ra Moisés vatyí ma cuu zavehi, i zavehi sii si. Ta yucuan cuenda tahan si sa cui.

¹² Tuhun i saha ra Ndyoo sii ra Moisés, vaha xaan si vatyí tuhun i saha maa ra Ndyoo cuu si cuan. Ta tandihí tyiño sa catyi ra Ndyoo vatyí zavaha yo, vaha xaan ta ndoo xaan si.

¹³ Ta tuhun vaha xaan cuan ¿atu sa yucuan cuu sa i zatívi sii? Yívi. Sa ña vaha sa i cuñi zavehi cuu sa i zatívi sii. Sa cuenda sa zavehi sii si ta tahan si sa cui. Tuhun i saha ra Ndyoo sii ra Moisés cuu

sa i zañaha sii, vatyí cuatyí cuu cuhva cuñi zavehi, zoco zuun ñi i zavehi sii si. Ta sihin cuhva cuan ta i zañaha tuhun cuan sii, vatyí quiñi xaan cuu cuhva cuñi zavehi.

14 Sito yo vatyí tuhun cuan nacatyí si sihin yo cuhva cuñi ra Ndyoo sa zavaha yo. Ta yuhvi cui minoo ñiyivi iyo cuatyí vatyí zavehi cuhva ña vaha sa cuñi zavehi, ta ndyaca ñaha cuatyí cuan sii.

15 Ña cutuñi iñi ñaa sa tehin vatyí ña zavehi cuhva cuñi zavehi sa ndisa. Ta sa ña tahan maa iñi, yucuan cuu sa zavehi.

16 Ta tatu zavehi minoo cuhva ña vaha, sa siñi tuñi vaha sa iyo sii, catyí si sihin vatyí ña vaha cuu cuhva zavehi, ta catyí si vatyí vaha tuhun i saha ra Ndyoo sii ra Moisés.

17 Ta vityí ña cuñi zavehi sa ña vaha, zoco iyo ca cuatyí. Ta yucuan cuenda zavehi sii si.

18 Nacote vatyí minoo ñiyivi iyo cuatyí cui. Ñahñi numinoo cuhva vaha iyo sii. Cuñi zavehi sa vaha, zoco ña ñihi cuhva yozo caa zavehi sii si vatyí minoo ñiyivi cuatyí cui.

19 Vatyí ña zavehi sa vaha sa cuñi zavehi, zoco zavehi sa ña vaha vazu ña cuñi zavehi sii si.

20 Ta sa zavehi sa ña vaha, zañaha si sii, vatyí iyo ca cuatyí. Ta cuatyí cuan cuu sa ndyaca ñaha sii.

21 Tacuan cuu si. Iyo minoo cuhva sii. Vazu cuñi zavehi sa vaha, zoco maa ñi sa ña vaha zavehi tandihí saha.

22 Vatyí sihin sa siñi tuñi vehi tahan xaan iñi tandihí tuhun i saha maa ra Ndyoo.

23 Zoco iyo inga cuhva sii, ta ña tahan iñi si cuhva cuñi sa siñi tuñi vehi. Ta cuhva sa iyo sii, ña cuñi

maa si zavaha si sa vaha. Maa maa ñi sa ña vaha cuñi si zavaha si. Ta ndyaca ñaha si sii.

²⁴ ¡Ndahvi yuhvi ra ndahvi! ¿Yoo sa cua zacacu sii, sihin cuhva sa zavehi sa ña vaha cuan?

²⁵ Sehi tyahvi ndyoo sii ra Ndyoo sa cuenda ra Jesucristo ra ndyaca ñaha sii yo vatyí maa ra cua zacacu sii. Sihin sa siñi tuñi vehi cuñi xein cundyique tandihi tuhun i saha maa ra Ndyoo, zoco sihin inga cuhva sa iyo sii, ta zatívi si sii, ta zavaha que sa ña vaha.

8

Tyindyee xaan Tatyí Ii ra Ndyoo sii yo ta cuu coo yo minoo cuhva saa

¹⁻² Vityí ma zandoho ca ra Ndyoo sii ñiyívi sa ndu-ñin sihin ra Cristo Jesús vatyí ña zavaha ca ñu cuhva cuñi coño ñuhu ñu, zoco zavaha ñu cuhva cuñi Tatyí Ii. Vatyí Tatyí Ii cuan saha xaan si sa vaha sii yo sa cuenda ra Cristo Jesús. Ta i ndasi si sii, cuhva i sindyaca ñaha cuatyí sii, ta tuhun sihi.

³ I zaquisi ra Ndyoo sii Zehe ra cuhva caa maa yo ñiyívi cuatyí. I quisi ra vatyí cua tyiyahvi ra sa cuenda cuatyí ñiyívi, ta i zandihi ra cuhva ndyaca ñaha sa ña vaha sii yo. Vatyí tuhun i saha ra Ndyoo sii ra Moisés ñá cuu zavaha si cuhva cuan vatyí ñahñi tundyee iñi iyo sii si sa cuenda cuatyí sa ndyaca ñaha sii ñiyívi.

⁴ Zoco i quisi ra Cristo vatyí cua cuhva ra cuhva sii yo, ta cua cuu tyaa yo yahvi sii cuhva vaha sa catyí tuhun sahnú cuan. Maa yo cuu ñiyívi zavaha cuhva cuñi Tatyí Ii ta yívi ca cuhva ña vaha sa cuñi maa yo.

⁵ Ñiyiví zavaha cuhva cuñi maa ñu, ndyico ñu ta zacuu ñu cuhva ña vaha sa cuñi ñu. Zoco ñiyiví cuu cuenda Tatyí Ii, ndyico ñu cuhva cuñi ra Ndyoo.

⁶ Tatu ndyico ñiyiví minoo cuhva ña vaha, cuhva cuñi maa ñu, cua cuu ñu. Zoco tatu ndyico ñu ta zavaha ñu cuhva cuñi Tatyí Ii cua coo sa taxi sii ñu sihin ra Ndyoo, ta cua cundito ñu sihin ra.

⁷ Vatyí tatu ndyico ñu minoo cuhva ña vaha, cuhva cuñi maa ñu, ñahñi sa taxi iyo sii ñu sihin ra Ndyoo vatyí ña tyaa ñu yahvi tuhun i saha ra Ndyoo sii ra Moisés, ta nu ña cuu zacuu ñu sihin si.

⁸ Ta ñiyiví zavaha sa ña vaha cuhva cuñi maa ñu, ña cuu zavaha ñu cuhva tahan iñi ra Ndyoo.

⁹ Zoco maa ndo, ña zavaha ca ndo sa ña vaha cuhva cuñi ndo, zavaha ndo cuhva cuñi Tatyí Ii tatu ndisa vatyí iyo Tatyí Ii ra Ndyoo sihin ndo. Vatyí tatu ñahñi Tatyí Ii sa saha ra Cristo iyo sihin minoo ñiyiví, yiví ñiyiví ra Cristo cuu ñu cuan.

¹⁰ Ta tatu iyo ra Cristo sisi añima ndo, tañi sa sihi coño ñuhu ndo cuu si sa cuenda cuatyí, zoco ndito añima ndo vatyí catyí ra Ndyoo vatyí ñahñi ca cuatyí ndo.

¹¹ I zanandoto ra Ndyoo sii ra Jesús sisi sa i sihi ra. Ta tacuan tucu maa ndo tatu iyo Tatyí Ii ra Ndyoo sihin ndo cua zanandoto tucu ra sii ndo sihin coño ñuhu ndo.

¹² Ta vityí ndoho yañi xaa, sa cuenda sa vatyí iyo Tatyí Ii ra Ndyoo sii yo ta ña tahan ca si sa tyaa yo yahvi sii cuhva ña vaha sa iyo sii yo ta cuhva ña vaha sa cuñi yo.

¹³ Vatyí tatu iyo ndo cuhva ña vaha, cuhva cuñi coño ñuhu ndo, cua cuu cuii ndo. Zoco tatu sihin

tundyee iñi sa saha Tatyí Ii ra Ndyoo sii ndo ta zaña ndo sa ña vaha cuan, cua cundito ndo sa ndisa cuii.

14 Vatyí ñiyivi ndyico cuhva zañaha Tatyí Ii maa ra Ndyoo, yucuan ñu cuu zehe ra Ndyoo.

15 Ndyá quivi i tñin cuenda ndo Tatyí Ii maa ra Ndyoo ta ña yuhu ca ndo sii ra. Yuhu minoo muzu sii ra ndyaca ñaha sii ra tatu xaan xaan ra, zoco ña yuhu ca maa ndo vatyí i tñin cuenda ndo Tatyí Ii ra, ta i nduu ndo zehe ra. Ta yucuan cuenda cuu catyí ndo sihin ra: “¡Ndyoo Zuti!”

16 Ta zuun ñi Tatyí Ii maa ra Ndyoo cuu sa zacoto sii yo vatyí zehe ra Ndyoo cuu sii yo.

17 Ta vityí cua ñihi yo sa vaha sa saha maa ra Ndyoo sii zehe ra. ñin ñi cua ñihi yo sii si sihin ra Cristo tatu ndyehe yo tundoho ñin ñi sihin ra. Ta ziqui cua catyí ra Ndyoo vatyí vaha xaan ñiyivi cuu yo ñin ñi sihin ra Cristo.

18 Sito vehi vatyí tundoho sa ndyehe yo vityí ma cuu caca iñi yo vatyí cahnu xaan si. Vatyí ityí nuu ca cua zañaha maa ra Ndyoo sii yo cuhva caa ra ta zii xaan cua cuñi yo quivi cuan.

19 Tandihí cuii sa i zavaha ra Ndyoo ndatu si ta ñihi xaan cuñi si sa cua tahan si quivi ta cua zañaha maa ra Ndyoo yoo sa cuu tandihí zehe ra.

20 Vatyí tandihí sa i zavaha ra Ndyoo i tiví si. Vazu ñahñi cuatyí i zavaha si, zoco i saha ra Ndyoo vatyí tandihí sa i zavaha ra cua tahan si tundoho ta cua tiví si (sa cuenda cuatyí sa zavaha ñiyivi). Ndyá quivi cua catyí ra Ndyoo, ta cua ndusaa tucu si inga saha.

21 Tandihí cuii sa i zavaha ra Ndyoo ta cua ndusaa tucu si inga saha quivi cua zama ra Ndyoo cuhva iyo si vityí, ta ma tiví ca si. Ta ñahñi ca

tundoho cua ndyehe si. Ta tacuan tucu tandihĩ cuii zehe ra Ndyoo.

²² Sito yo vatyĩ tandihĩ sa i zavaha ra Ndyoo ta ndyehe xaan si tundoho. Cahnu xaan cuu tundoho ndyehe si.

²³ Ta ña maa ñi ñuu ñiyivĩ sa zavaha ra Ndyoo cua ndyehe si tundoho, ndya maa yo ñiyivĩ sa i tĩn cuenda Tatyĩ Ii ra Ndyoo sa saha ra Ndyoo sii yo sa xihna ñi, ta ndyehe xaan tucu yo tundoho. Cahnu xaan tundoho ndyehe yo, ta ndahvi xaan cuĩi yo vatyĩ cuĩi xaan yo sa cua tahan si quivĩ cua zama ra Ndyoo kuhva iyo yo. Ta quivĩ cuan cua zandihĩ ra tandihĩ tundoho sa ndyehe yo ta tandihĩ cuatyĩ yo. Cua zama ra kuhva iyo coño ñuhu yo. Ta cua nduu yo minoo kuhva saa.

²⁴ Vazu tañaha ca ndyehe yo kuhva cuan, zoco sino iñi yo vatyĩ cua tahan si quivĩ cua nduu yo kuhva caa maa ra Ndyoo. Tatu ndatu yo quivĩ cuan ña cuĩi si catyĩ si vatyĩ sa ñihi yo sa ndatu yo. Tatu sa yaha ñihi yo sii si, ma cuatu ca yo.

²⁵ Zoco tatu sino ndisa cuii iñi yo vatyĩ cua saa quivĩ ityĩ nuu ca ta cua zavaha ra Ndyoo kuhva cuan ta vazu ña ndyehe yo sii si vityĩ zoco zandyee yo iñi yo ta cuatu yo sii si. (Sino iñi yo vatyĩ cua ñihi yo sii si, ta yucuan cuenda ndatu yo sii si.)

²⁶ Ta zuun ñi kuhva cuan tyindyee Tatyĩ Ii ra Ndyoo sii yo sihin sa ña cuu sii yo vatyĩ ña sito yo yozo caa cua caca yo sii ra Ndyoo kuhva cuĩi si. Ta Tatyĩ Ii cuan sica si sii ra Ndyoo sa cuenda maa yo nu ña ñihi ca yo kuhva cahan yo sihin ra.

²⁷ Sito maa ra Ndyoo ñaa sa sica iñi yo sihin añaima yo, ta sito ra ñaa sa cuĩi Tatyĩ Ii cuan caca

si vatyí sica si cuhva cuñi maa ra Ndyoo sa cuenda ñiyiví sino iñi sii ra Ndyoo sa ndisa cuii.

Ñahñi sa cuu tyaa siyo sii yo sihin cuhva cuñi xaan maa ra Ndyoo sii yo

²⁸ Sito yo vatyí ñiyiví cuñi sii ra Ndyoo, tandihí cuii sa tahan ñu zoco tyindyee si sii ñu. Maa ñu cuu ñu i casi ra Ndyoo vatyí ñiyiví ra cua cuu sii ñu.

²⁹ Ndyaa sa xihna cuii ñi ta sa sito ra Ndyoo yoo cuu ñiyiví cua cundyico sii ra, ta i catyí ra vatyí cua nduu ñu tañi cuhva caa Zehe ra. Ta ra Jesucristo cuu Zehe ra Ndyoo. Maa ra cuu Zehe Ndyoo sa ndisa sa xihna ñi, ta ziquí i nacacu saa cuaha xaan ca yo vatyí cuu yo yañi ra.

³⁰ Ta i cana ra Ndyoo sii ñiyiví sa sito ra vatyí cua cundyico ñu sii ra. Ta sii ñiyiví sa i cana ra i catyí ra vatyí ñahñi ca cuatyí ñu. Ta vaha xaan cua zanduu ra sii ñu tañi cuhva caa Zehe ra.

³¹ ¿Ta ñaa ca sa cuu catyí yo vityí? Ndyaa maa ra Ndyoo sihin yo. Ta yoñi sa cuu tyaa siyo sii yo sii maa ra Ndyoo.

³² Vatyí i zaquisi maa ra Ndyoo sii sa zuun ñi maa Zehe ra, ta i saha ra Ndyoo sa cuu ra Jesús sa cuenda tandihí cuii yo. Yucuan cuenda sito yo vatyí tañi cuhva i saha ra Ndyoo sa cuu Zehe ra cuenda yo, ta tacuan tucu cua cuhva tucu maa ra tandihí cuii ca sa vaha sii yo.

³³ Ta ityí nuu maa ra Ndyoo ¿yoo sa cuu tyaa cuatyí sata ñiyiví i casi ra? Yoñi. Vatyí maa ra cuu ra catyí vatyí ñahñi ca cuatyí ñu.

³⁴ Yoñi cua catyí ityí nuu ra Ndyoo vatyí iyo cuatyí yo vatyí ra Cristo cuu ra i sihi sa cuenda cuatyí yo, ta ziquí i nandoto ra. Ta vityí ndyaa ra

siyo cuaha ra Ndyoo. Ta cahan ra sihin ra Ndyoo sa cuenda maa yo.

³⁵ ¿Yoo sa cuu tyaa siyo sii yo sihin cuhva cuñi xaan ra Cristo sii yo? Yoñi. Vazu ndyehe xaan yo tucuihya iñi a tundoho a sahñi tahan ñiyivi sihin yo sa cuenda Tuhun Ndyoo a vazu iyo tama a ñahñi zahma yo iyo a cuaha xaan sa zayuhu sii yo a cuñi cahñi ñiyivi sii yo, zoco ma zaña ra Cristo sa cuñi ra sii yo.

³⁶ Ndisa cua tahan yo tundoho tañi catyi si nuu tutu ra Ndyoo:

Sa cuenda moo ta cuñi cahñi ñiyivi sii ndi tandihi quivi.

Ta zacuu ñiyivi sii ndi tañi minoo mvee ticatyi sa cua cahñi ñu.

Tacuan catyi Tuhun ra Ndyoo.

³⁷ Zoco vazu tahan yo tandihi cuui cuhva ya, zoco vaha xaan cua zahacanaa yo ziqui si sa cuenda ra sa cuñi xaan sii yo.

³⁸⁻³⁹ Sito vehi vatyí ñahñi maa sa cuu tyaa siyo sii yo sihin cuhva cuñi xaan maa ra Ndyoo sii yo. Ta zañaha ra sii yo vatyí cuñi xaan ra sii yo sihin cuhva i sicoo ra Cristo ta cuhva i zavaha ra. Vazu ndito ca yo a vazu sa sihi yo zoco cua cuñi ca ra Ndyoo sii yo. A vazu ángel a tatyí cuihna cuñi tyaa siyo sii yo, zoco ma cuu. A ñaa sa tahan yo vityi a sa cua ndyehe yo ityi nuu ca a sa iyo ityi ziqui a nu ñuhu. A ñaa cuui ca maa sa iyo, zoco ma cuu tyaa siyo si sii yo sihin cuhva cuñi xaan maa ra Ndyoo sii yo sa cuenda ra Cristo Jesús, ra ndyaca ñaha sii yo.

9

I casi ra Ndyoo sii ñiyivi hebreo

¹ Ñiyivi ra Cristo cui, ta quehin sa ndisa. Ña vatye. Ta tyindyee Tatyí li ra Ndyoo sii sa siñi tuñi sii, ta site vatyi (tandihí sa tyei ihya ta) sa ndisa cuu si.

² Cuihya xaan cuñi añime. Ta yaha xaan ndahvi cuñi si. (Sa cuenda ñu hebreo, ñiyivi sii.)

³ Ta ndya kuhva cuñi sa cua tyaa siyo ra Ndyoo sii, sii ra Cristo ta zacuhun ra sii nu xaan tatu zacacu zuhva ra sii ñu hebreo, ñiyivi sii. Tatu sa vatyi cuu tacuan, zoco ma cuu sa tacuan.

⁴ Quehin sa cuenda ñiyivi hebreo vatyi i casi ra Ndyoo sii ñu vatyi cuñi ra zañaha ra vatyi cuñi xaan ra sii ñu. Zuun ñi sii maa ñu i zañaha ra Ndyoo kuhva caa ra sa ndisi xaan ra. Ta sihin maa ñu i catyi ra Ndyoo kuhva cua zavaha ra sa vaha xaan sihin ñu. Ta i saha ra tuhun sa i saha ra sii ra Moisés sii ñu, ta i catyi ra sihin ñu yozo caa cua zavaha ra sa vaha sihin ñu ityi nuu ca. Ta i zañaha ra sii ñu kuhva cuñi ra sa cua zacahnu ñu sii ra.

⁵ Ra hebreo i cuu tandihí ñiyivi sahnu sii yo, ta i sino xaan iñi ra sii ra Ndyoo (tañi maa ra Abraham, ra Isaac, ta ra Jacob). Ta zuun ñi ñiyivi hebreo cuu ra Cristo. Ndyaca ñaha ra ziqui tandihí cuii sa iyo. Nazacahnu yo sii maa ra Ndyoo tandihí cuii tyiemvu. Ta nacuu si tacuan.

⁶ Ña catyi sa ñá zavaha ra Ndyoo kuhva i catyi ra ta sa naha, kuhva cua zavaha ra sihin ñiyivi hebreo vatyi ña tandihí ñiyivi hebreo ta cuu ñu ñiyivi ra Ndyoo sa ndisa.

⁷ Ña tandihí ñiyivi ra Abraham ta cuu ñu ñiyivi sii ra Ndyoo vatyi catyi Tuhun ra Ndyoo nu cahan ra

sihin ra Abraham ta catyi ra: “Maa ñi sa cuenda ra Isaac ta cua coo ñiyivi suun.” (Tacuan i catyi ra Ndyoo sihin ra Abraham yoo cuu sa cua cuu ñiyivi sii ra sa ndisa cuii.)

⁸ Cuñi si catyi si vatyí tandíhi cuii ñiyivi i zacacu zihí sii cuhva iyo ñuu ñiyivi ya, yivi ñiyivi ra Ndyoo cuu sii ñu. Zoco tandíhi cuii ñiyivi sa cua càcù cuhva cuñi ra Ndyoo, yucuan ñu cuu zehe ra sa ndisa cuii.

⁹ Ta ihya cuu cuhva i saha ra Ndyoo tuhun ra sii ra Abraham: “Cua quisi nu ndyaa ndo cuhva i catyi, ta cua coo zehe ña Sara”, catyi ra. (Ihya cuu cuhva i cacu ra Isaac, cuhva i catyi maa ra Ndyoo.)

¹⁰ Ta ña tacuan ñi, vatyí ña Rebeca tindaha ña sihin ra Isaac yí ña, zehe ña Sara. Maa ra cuu minoo ñiyivi sahnú sii yo. Ta sicoo zehe ñu. (Tinihi ra i cacu ra.)

¹¹⁻¹² Zoco cuee ca sa cacu ra, ñá zavaha ra sa vaha a sa ña vaha, ta sa i catyi ra Ndyoo sihin ña Rebeca: “Ra cua cacu sa xihna ñi cua cuu ra muzu sii ra luhlu ca.” Tacuan i zañaha ra Ndyoo vatyí casi ra sii ñiyivi sa cuñi maa ra ta yivi sa cuenda cuhva zavaha ñu (vatyi i cuñi ca ra Ndyoo sii ra luhlu ca cuee ca sa cacu ra).

¹³ Tañi i catyi ra Ndyoo: “I cuñi que sii ra Jacob, zoco ñá cuñi sii ra Esaú.”

¹⁴ Tacuan i zavaha ra Ndyoo, zoco ma cuu catyi yo vatyí ña vaha cuhva zavaha ra.

¹⁵ I catyi ra Ndyoo sihin ra Moisés: “Cua cundahvi iñi sii ñiyivi, zoco zuun ñi mi cua catyi yoo sii cua cundahvi iñi.” Catyi ra.

¹⁶ Ta tacuan cuu cuhva sito yo vatyí ma cundahvi iñi ra Ndyoo sii ñiyivi sa cuhva cuñi ñi maa

ñu ta nducu xaan ñu cuhva. Zoco cua cuu si cuhva cuñi maa ra Ndyoo vatyí maa ra cuu ra cundahvi iñi yoo sii cuñi maa ra.

17 Catyi Tuhun Ndyoo cuhva i cahan ra sihin ra Faraón rey ñuu Egipto ta sa naha. (Vatyí ñihi xaan iñi rey cuan), ta i catyi ra Ndyoo sihin ra: “I sehi sa cundyaca ñohon ta cua zañehi vatyí iyo xaan cuhva sii. Ta nacahnu ñuu ñiyiví cua zacahnu ñiyiví sii.” Catyi ra.

18 Tacuan iyo maa ra Ndyoo. Cundahvi iñi ra sii yoo ra cuñi ra cundahvi iñi ra. Ta saha ra sa nduñihi iñi inga ñiyiví cuhva cuñi maa ra.

19 Ta yucuan cuenda cua catyi ndo sihin: “¿Ta ñaa cuenda tyaa ra Ndyoo cuatyí sata ñiyiví? ¿Ta yoo cuu sa ña zavaha cuhva cuñi ra?”

20 Zoco ña vaha cuhva sica iñun vatyí ¿yoo ra cuun ta cohon nu cahan ra Ndyoo? Vatyí minoo quiyí cuan, ña catyi si sihin ñiyiví i zavaha sii si: “Ña vaha cuhva i zavohon sii. ¿Ñaa cuenda i zavohon sii tyehen?”

21 Tucun minoo ñiyiví zatyíño sihin ndyahyu ta zavaha ñu ndaha tyíño sa cua cutyíño ñu sisi vehe, ta cuu zavaha ñu ñaa sa cuñi maa ñu sihin zuun ñi maa ndyahyu cuan tu cuu si minoo ndaha tyíño vaha ca a cuu si minoo sa ndahvi ñi caa.

22 I cuñi ra Ndyoo zañaha ra sii ñiyiví cuhva tahan si zandoho ra sii ñu tatu zavaha ñu sa ña vaha. Ta cuñi tucu ra zañaha ra vatyí cuaha xaan cuhva iyo sii ra. Yucuan cuenda zandyee xaan ra iñi ra sihin ñiyiví ña vaha. Maa ñu cuu ñiyiví tahan si ndoho. Ta cuéé ca ta cua zanaa ra sii ñu.

23 Ta inga tucu cuhva. I cuñi ra zañaha ra cuhva vaha xaan sa zavaha ra sihin inga ñiyiví, ñu i saha

maa ra tumañi iñi sii. Maa ñu cuu ñu i casi ra vatyi
cua ñihi ñu tandihí cuii sa vaha xaan ta cua cundito
ñu sihin ra.

²⁴ Ta zuun ñi maa yo cuu ñiyivi cuan. Iyo yo
cuu yo ñiyivi hebreo. Ta iyo yo yivi. Zoco i casi ra
Ndyoo sii tandihí yo.

²⁵ Tañi i catyi maa ra Ndyoo nuu tutu i tyaa ra
Oseas ta sa naha:
Iyo ñiyivi sa yivi ñiyivi mi, zoco cua zandui ñiyivi sii
sii ñu.

Ñá cuñi sii ñu, zoco vityi cua cuñi sii ñu.

²⁶ Ta zuun ñi nu i catyi sihin ñu: “Yivi ñiyivi sii mi
cuu sii ndo”, zuun ñi yucuan cua nduu ñu
ñiyivi sii mi, ra Ndyoo ndito.

²⁷ Ta i catyi ra Isaías sa cuenda ñiyivi hebreo:
“Vazu cuaha xaan ñiyivi hebreo tañi ñiyiti yuhu
tyañuhu, zoco zuhva cuii ñi ñu cua cacu.

²⁸ Vatyi yatyi xaan ta cua zavaha ra Ndyoo
tandihí cuii cuhva catyi ra ihya ñuu ñiyivi.”

²⁹ Tañi i catyi tucu maa ra Isaías:
Tatu ma zacacu ra Ndyoo sii uu a uñi tahan yo,
cunaa tandihí yo
Tañi i naa ñiyivi ñuu Sodoma ta ñuu Gomorra ta sa
naha.

*Sica iñi ñiyivi hebreo vatyi cua càcù ñu vatyi
zavaha ñu sa vaha*

³⁰ ¿Ta ñaa cua catyi yo vityi? Ñiyivi sa yivi ñiyivi
hebreo cuu ñá nanducu maa ñu cuhva coo vaha
ñu ityi nuu ra Ndyoo. Zoco vityi nañihi ñu cuhva
cuan sihin sa sino ñi iñi ñu.

³¹ Ta ñiyivi hebreo i zavaha xaan ñu cuhva sa
sica iñi maa ñu vatyi cua nduvaha ñu ityi nuu ra
Ndyoo. Zoco ñá cuu. Ñá cuu zavaha ñu tandihí cuii

cuhva vaha tañi catyi tuhun i saha ra Ndyoo sii ra Moisés.

³² ¿Ta ñaa cuenda ñá ñihi ñu cuhva catyi ra Ndyoo sihin ñu vatyí ñahñi ca cuatyí ñu? Ñá ñihi ñu cuhva cuan vatyí ñá sino iñi ñu vatyí cua càcù ñu maa ñi sihin tumañi iñi sa saha maa ra Ndyoo. Sica iñi ñu vatyí cua càcù ñu sa cuenda sa vaha i zavaha ñu. Ta i cuu si tañi minoo cuhva tatu catyíhi saha ñiyívi sihin minoo yuu.

³³ Tañi catyi si nuu tutu ra Ndyoo: Cua caqui sii minoo ra tañi minoo yuu nu iyo ñiyívi hebreo.

Ta cua catyíhi saha ñu sii ra.

Zoco tatu sino iñi ñu sii ra, cua quita vaha ñu.

10

¹ Ndoho yañi xaa, cahan xein sihin ra Ndyoo sa cuenda ñiyívi hebreo, ta sihin tandíhi cuii añime cuñi xein sa cua cacu ñu.

² Sehi sa ndaa cuenda ñu vatyí cuñi xaan ñu zacahnu ñu sii ra Ndyoo, zoco ña ñihi ñu cuhva yozo caa zavaha ñu sii si sa ndisa.

³ Vatyí ña sito ñu cuhva zanduvaha ra Ndyoo sii ñu cuhva cuñi maa ra, ta i nducu ñu inga cuhva sa cuñi maa ñu, ta ña tyaa ñu yahvi cuhva i saha maa ra Ndyoo.

⁴ Ta sa naha cuñi ñu nduvaha ñu ityi nuu ra Ndyoo sihin sa tyaa ñu yahvi tuhun i saha ra sii ra Moisés. Zoco vityí sa i quisi ra Cristo ta zandíhi ra cuhva cuan. Vityí sa sino ñi iñi yo sii ra ta nduvaha yo ityi nuu maa ra Ndyoo ta natíin cuenda ra sii yo.

⁵ Ta nu i tyaa ra Moisés i catyi ra vatyí tatu zavaha minoo ra tandíhi cuii sa vaha cuhva catyi

tuhun i saha ra Ndyoo sii ra, tacuan ta cua coo ra minoo cuhva vaha xaan ta cua cundito ra tandihî cuii tyiemvu.

⁶ Zoco cuhva nduvaha yo sihin sa sino iñi yo, yivî minoo cuhva sa ñihi xaan nanducu yo cuu si vatyî catyî si: “Ma catyî ndo sihin añaïma ndo: ¿Yoo cua cuhun ndya gloria ta cua zanoo ra sii ra Cristo?”

⁷ Ta ma catyî ndo: ¿Yoo cua noo sisi ñuhu vatyî cua zanandoto ra sii ra Cristo sisi sa i sihi ra?”

⁸ Vatyî ihya cuu cuhva catyî si: “Yatyî xaan iyo tuhun vaha ra Ndyoo sii ndo. Yuhu ndo ta sisi añaïma ndo iyo si.” Ta zuun ñi tuhun cuan cuu tuhun sa zacoto maa ndi. Tuhun sa cuenda sa sino iñi yo sii ra Cristo cuu si.

⁹ Ta tatu catyun sihin ñiyivî vatyî ra Jesús cuu ra ndyaca ñaha suun ta sino ndisa iñun sihin añaïmon vatyî i zanandoto ra Ndyoo sii ra sisi sa i sihi ra, cua cacun.

¹⁰ Vatyî sihin añaïma yo sino iñi yo (sa i sihi ra Jesús ta i nandoto ra vatyî cua zacacu ra sii yo), ta tacuan ta nduvaha añaïma yo. Ta sihin yuhu yo saha yo sa ndaa cuhva sino iñi yo. Tacuan ta cua cacu yo.

¹¹ Vatyî catyî Tuhun ra Ndyoo: “Tandihî ñiyivî sa sino iñi sii ra, cua ñihi ñu sa vaha xaan sa cua cuhva ra.”

¹² Vatyî ra Ndyoo ña zîin ndyehe ra sii minoo ñiyivî ta sii inga ñu vazu tata hebreo cuu yo a griego a ñaa ñi maa tata cuu yo vatyî minoo tuhun ñi maa ra ndyaca ñaha sii tandihî cuii yo. Ta saha xaan maa ra tumañi iñi sii tandihî cuii yo sa sica sii ra.

13 Tañi catyi Tuhun ra Ndyoo vatyí tandihí ñiyiví sa cua caca sii ra Jesús, ra ndyaca ñaha sii yo, cua cacu ñu.

14 ¿Ta yozo caa cuu caca ñu sii ra tatu ña sino iñi ñu sii ra? ¿Ta yozo caa cuu sino iñi ñu sii ra tatu tañaha ca coto ñu vatyí i quisi zacacu ra sii yo? Ta ma cuu coto ñu tatu yoñi sa nacatyí sihin ñu.

15 Ta ma cuu nacatyí ñiyiví Tuhun ra Ndyoo tatu yiví maa ra tasi sii ñu. Ta catyi Tuhun ra Ndyoo: “Vaha xaan tatu quisi ñiyiví nacatyí tuhun vaha cuhva cacu yo”, catyi si.

16 Zoco ña tandihí ñiyiví sa siñi tuhun cuan ta tyaa ñu yahvi sii si vatyí iyo ñu tañi cuhva catyi ra Isaías: “Tata, yoñi sa sino iñi tuhun i zacoto ndi”, catyi ra.

17 Xihna ca siñi yo tuhun vaha sa cuenda ra Cristo, ta ziqui sino iñi yo sii si.

18 Ta catyi vatyí sa ndisa sa siñi ñiyiví hebreo tuhun vaha vatyí catyi Tuhun ra Ndyoo: Sa i zacoto ñiyiví Tuhun moo nacahnu cuii ñuu ñiyiví, catyi Tuhun ra Ndyoo.

19 Ta cua catyi tuqui inga cuhva: ¿Atu ñá sito ñiyiví hebreo vatyí cua zacacu tucu ra Ndyoo sii inga ca ñiyiví? Sa i sito ñu vatyí i cahan ra Moisés sa cuenda ra Ndyoo ta sa naha, ta i catyi ra:

Cua zacuxein sii ndo sihin ñiyiví sa ñahñi sa siñi tuñi sa cuaha,

Vatyí ñu cuan cua nanduu ñu ñiyiví mi.

Ta maa ndo cua cuxaan ndo.

20 Ta ñá yuhu ra Isaías, ta i cahan ra sa cuenda ra Ndyoo ta catyi ra:

Ñiyiví sa ñá nanducu sii, yucuan ñu i nañihi sii.

I zañehi cuhva iye sii ñu vazú ñá nducu tuhun ñu.

²¹ Zoco sa cuenda ñiyivi hebreo catyi ra Ndyoo: “Ndyiyaca cuii i cane sii ñiyivi sii, vatyí quisi ñu, zoco ñá tyaa ñu yahvi. Ñihi xaan iñi ñu.”

11

Iyo zuhva ñiyivi hebreo sa nañihi ñu cuhva cacu ñu

¹ Ña catyi vatyí ndaha i tyaa siyo ra Ndyoo sii ñiyivi hebreo. Ña tacuan, yañi xaa. Yuhvi tucu ra hebreo cui, ñiyivi ra Abraham ta ñiyivi ra Benjamín.

² I casi ra Ndyoo sii ñiyivi ra ta sa naha, ta ñá tyaa siyo ra sii ñu ndaha ñi. ¿Atu ña sito ndo nu cahan Tuhun ra Ndyoo sa cuenda ra Elías? nu i cuxaan ra ta cahan xaan ra sii ñiyivi hebreo ta i catyi ra:

³ “Tata, i sahñi ñiyivi sii ñu cahan tuhun moo, ta i sani ñu altar nu i zacahnu ñu suun. Yuhvi ñi ca zacahnu suun, ta cuñi cahñi ndihi ñu sii”, catyi ra.

⁴ Ta i nacahan ra Ndyoo ta catyi ra: “Iyo usa mil ca ñiyivi sa i naquihin vehi. Tañaha ca cua cuiñi siti ñu nuu ndyoo sa nañi Baal, ta ña zacahnu ñu sii ndyoo cuan”, catyi ra Ndyoo.

⁵ Ta zuun ñi cuhva cuan cuu si ndya cuhva ndya vityi vatyí iyo zuhva ca ñiyivi hebreo sa zacahnu sii ra Ndyoo sa ndisa cuii. I casi ra sii ñu, ta saha maa ra tumañi iñi sii ñu.

⁶ Saha maa ra Ndyoo tumañi iñi ta yivi sa cuenda sa vaha sa zavaha ñu vatyí tatu saha ra sa vaha sa cuenda sa zavaha ñu, yivi ca tumañi iñi cuu si.

⁷ Ihya cuu cuhva iyo si. Nanducu xaan ñiyivi hebreo cuhva nduvaha ñu sihin ra Ndyoo, ta ña nañihi ñu cuhva cuan. Zoco ñiyivi i casi ra Ndyoo,

yucuan cuu ñu sa i nañihi cuhva cuan. Ta tandihi inga ñiyivi cuan, i zanduñihi ra Ndyoo iñi ñu.

⁸ Tañi catyi si nuu tutu ra Ndyoo: “Saha ra Ndyoo minoo sa siñi tuñi sii ñu sa ma cutuñi iñi ñu. Ndyehe ñu, zoco ña cutuñi iñi ñu sa ndyehe ñu. Siñi ñu, zoco ndya vityi ta ña cutuñi iñi ñu sa siñi ñu.”

⁹ Ta i cahan tucu ra David ziqui cuhva cuan, ta catyi ra:

Cua cuzi iñi ñu sihin sa vaha sa sasi ñu ta tandihi ndaha tyiño vaha ñu.

Zoco yucuan cuu sa cua zandoyo ñuhu sii ñu.

Ta sa cuenda cuhva cuan ta cua ndoho ñu.

¹⁰ Tañi cua nducuaa ñu ta ma ndyehe ñu vaty ma coto ñu sa ndisa.

Ta tandihi cuii quivi cua ndyehe ñu tundocho.

Cuhva cacu ñiyivi sa yivi ñiyivi hebreo cuu

¹¹ ¿Atu i catyih saha ñiyivi vaty ndaha nduva cuii ñu? Yivi. Zoco i zavaha ñu sa ña vaha (sa ña sino iñi ñu sii ra i zaquisi ra Ndyoo), ta tacuan ta i saha maa ra Ndyoo sa cacu aña inga ñiyivi sa yivi ñiyivi hebreo cuu. Ta tacuan ta cua cuxaan ñiyivi hebreo vaty cua sino iñi inga ñiyivi. Ta sihin cuhva cuan ta cua cuñi tucu ñiyivi hebreo sa cacu ñu.

¹² Ña tñn cuenda ñiyivi hebreo cuhva i saha maa ra Ndyoo, zoco cuhva cuan i quita vaha si sa cuenda inga ñiyivi vaty cuu sino iñi ñu. Ta ndya vityi zuhva cuii ñi ñiyivi hebreo cua cacu vaty i tyaa siyo ñu cuhva i saha maa ra Ndyoo, ta i saha ra sii si sii inga ñiyivi. Ta cuaha xaan ñu i sino iñi. Zoco quivi cua quihvi tucu ñiyivi hebreo cuenda ra Ndyoo sa ndisa, yucuan quivi vaha xaan ta tyaqui xaan cua cuu.

¹³ Ta ndoho sa yiví ñiyiví hebreo cuu, sihin maa ndo quehin. Yuhvi cui minoo ra i tava ra Jesús tyiño sa cuhin nu iyo ñiyiví sa yiví ñiyiví hebreo cuu. Ta site vatyi ñiñi xaan cuu tyiño i saha maa ra Ndyoo sii.

¹⁴ Ta zacote Tuhun Ndyoo sii ndo vatyi cuñi vatyi cua ndyehe ñiyiví hebreo cuhva sino iñi maa ndo ta cua cuñi tucu maa ñu zavaha ñu cuhva cuan. Ta tacuan ta cua cacu ñu.

¹⁵ Sa cuenda sa i tyaa siyo ra Ndyoo sii ñiyiví hebreo ta i tñin cuenda ra sii inga ñiyiví ndya vaha ñi. Ta quiví cua natñin cuenda tucu ra sii ñiyiví hebreo ta cua cuu si tañi cua nandoto tucu ñu sisi sa i sihi ñu.

¹⁶ Tatu siin yusa sa quita nuu sa cuaha cuan ta cuenda ra Ndyoo cuu si, cuenda ra Ndyoo cua cuu tandihí ca si sa cuaha ca cuan. A tatu minoo yoho yutu cuan cuu cuenda ra Ndyoo, cuenda ra cua cuu tucu tandihí yutu cuan.

¹⁷ Zoco tatu i tahnu zuhva zoco yutu olivos, ta maa ndo i ndihví yucuan, vazu zoco yutu olivos ndya vaha ñi cuu ndo sa iyo sisi cuhu, zoco cua ñihi tucu ndo tundyee iñi sihin sa vaha sa iyo sii yoho yutu olivos vaha cuan.

¹⁸ Ma zacahnu ndo sii ndo ta catyi ndo vatyi vaha xaan ca maa ndo ta ziquí zoco tu sa i quita. Nacohon iñi ndo vatyi yoho yutu cuan cuu sa tyindyee sii tu ta ma nduva tu, ta yiví ndoho sa cuu zoco tu.

¹⁹ Cua catyi ndo: “I tahnu zuhva zoco tu vatyi tacuan ta cuu ndihví nduhví”, catyi ndo.

²⁰ Ndisa vatyi i tahnu zuhva zoco tu cuan vatyi ña sino iñi ñiyiví cuan tuhun sa cuenda maa ra Jesús. Ta maa ndo i ndihví ndo vatyi i sino iñi ndo.

Ma zacahnu ndo sii ndo. Vaha ca zacuenda ndo sii ndo coto tava ra Ndyoo sii ndo.

²¹ Vatyí ñá cundahví iñi maa ra Ndyoo sii zoco yutu sa i sindyaa nu yutu cuan. Tacuan tucu maa ndo, zacuenda ndo sii ndo coto ma cundahví tucu iñi ra sii ndo.

²² Coto ndo vatyí vaha xaan añima maa ra Ndyoo ta xaan xaan tucu ra, nduu cuhva. Sii ñiyíví ña tyaa yahví sii ra, cuxaan ra. Zoco sihin ndoho, vaha xaan ra tatu ndoo ndo sihin ra. Zoco tatu ma ndoo ndo cua tyaa siyo tucu ra sii ndo.

²³ Ta ñiyíví hebreo tatu nasino iñi ñu, cua nanduú tucu ñu zoco yutu vaha cuan vatyí iyo cuhva sii maa ra Ndyoo, ta cuu zananduú tucu ra sii ñu.

²⁴ Vatyí tatu i sahndya ra Ndyoo sii ndo sii minoo yutu olivos ndya vaha ñi sa iyo sisi cuhu ta tyihi ra sii ndo nuu minoo yutu olivos vaha, ñiñi xaan ca cuñi si sa nandihví zuun ñi zoco vaha maa tu.

Nu ndihí tuhun cua cacu ñiyíví hebreo

²⁵ Ta ndoho yañi xaa, ña cuñi sa ma cutuñi iñi ndo tuhun xehe ya coto caca iñi ndo vatyí ñiñi xaan ca maa ndo. Cuñi sa coto ndo vatyí i nduñihi iñi ñiyíví hebreo zuhva quíví vatyí tacuan ta cuu sino iñi tandihí inga ñiyíví sa cuñi maa ra Ndyoo.

²⁶ Ta ziquí cua cacu tandihí ñiyíví hebreo tañi catyí si nuu tutu ra Ndyoo:

Minoo ra sa cua zacacu cua quisi sa cuenda ñiyíví hebreo, ta minoo ra hebreo cua cuu tucu ra. Cua tyaa siyo ra cuatyí sa iyo añima ñiyíví ra Jacob.

²⁷ Ta ihya cuu tuhín sa sehi sii ñu vatyí ndisa cua tyaa siye cuatyí sa iyo añima ñu, catyí si.

28 Cuxaan ñiyiví hebreo sihin ra Ndyoo sa cuenda tuhun vaha cuenda ra Cristo. Ta tacuan ta cuu sino iñi maa ndo. Zoco maa ñu cuan cuu ñu i casi ra Ndyoo ndya ta sa naha, ta cuñi xaan ra sii ñu vatyí i sino iñi ñiyiví sahnu sii ñu sii ra.

29 Ta ma cuu zama ra Ndyoo cuhva tatu sa i casi ra sii ñiyiví ta cuhva saha maa ra sa vaha sii ñu.

30 Ñá tyaa maa ndo yahvi sii ra Ndyoo ta sa naha, zoco vityí cundahví iñi ra sii ndo vatyí ñá i tyaa ñiyiví hebreo yahvi sii ra.

31 Ta tacuan tucu, ña tyaa ñiyiví hebreo yahvi sii ra ndya vityí. Ta sa cuenda sa vatyí cundahví iñi ra Ndyoo sii maa ndo ta cua cundahví tucu iñi ra sii ñu ityi nuu ca.

32 Vatyí saha maa ra Ndyoo sa ma tyaa tandihí cuii ñiyiví yahvi sii ra vatyí tacuan ta cuu cundahví iñi ra sii tandihí cuii yo.

33 Cuaha xaan cuaha xaan sa siñi tuñi maa ra Ndyoo, ta sito ra tandihí cuii. Ma cuu cutuñi iñi maa yo cuhva sica iñi ra ta cuhva zavaha ra. Maa ra cuu ra zacuu tandihí.

34 Catyi Tuhun ra Ndyoo: “Yoñi sa sito cuhva sica iñi maa ra ndyaca ñaha sii yo, ta yoñi sa cuu cuhva sa siñi tuñi vaha sii maa ra.

35 Yoñi sa cuu cuhva sa vaha sii ra Ndyoo ta ziqui tyiyahví ra Ndyoo sii ra.”

36 Vatyí ndya nu ndyaa maa ra i quita tandihí sa iyo. Maa ra i zavaha sii si. Ta zavaha ra vatyí cua cacu tandihí cuii tyiño sihin minoo cuhva sa cua zacahnu si sii maa ra. Nazacahnu yo sii ra tandihí cuii tyiemvu. Ta nacuu si tacuan.

12

Cuhva vaha cua coo yo vityi sa sino iñi yo

¹ Yucuan cuenda zañiñi sii ndo, ndoho yañi xaa, vatyí nacuhva ndo sii ndo sii ra Ndyoo vatyí cundahvi iñi ra sii ndo. Nacuhva ndo sii ndo sii ra ta nduvaha ndo cuhva cuñi ra vatyí yucuan cuu cuhva cuñi si sa zacahnu ndo sii ra.

² Ta ma coo ca ndo cuhva iyo ñiyiví ñuu ñiyiví ya. Zama ndo cuhva sica iñi ndo. Ta tacuan ta cua coto ndo cuhva cuñi maa ra Ndyoo sihin ndo. Cua coto tucu ndo vatyí cuhva tahan iñi maa ra Ndyoo, maa ñi maa sa vaha cuu, ta ndoo xaan si, ta ñahñi cumañi si.

³ I casi ra Ndyoo sii, ta i saha ra tyiño sii. Yucuan cuenda catyí sihin tandihí ndo vatyí ma caca iñi ndo vatyí sito xaan ndo. Zoco caca iñi ndo minoo cuhva vaha sihin minoo sa siñi tuñi vaha cuhva saha ra Ndyoo sa zatyíño ndo tyiño ra. Sii sa minoo minoo ndo saha ra sa zñin zñin cuhva zatyíño ndo tyiño ra. Iyo ndo cuu zavaha ndo tyiño ra minoo cuhva. Ta iyo ndo zavaha ndo sii si inga cuhva.

⁴ Tañi minoo coño ñuhu yo, cuaha xaan nu ndyaa tahan si, zoco zñin zñin cuhva zatyíño si. Ta ña inuu ñi tyiño zavaha sa minoo minoo si vazu minoo ñi coño ñuhu cuu si.

⁵ Ta tacuan tucu maa yo, cuaha ñiyiví cuu yo, zoco sa tandihí yo ta ñin ñi cuu yo sihin ra Cristo. Ta sa ndu-ñin yo sihin minoo ta inga.

⁶ Saha maa ra Ndyoo ndatu sii sa minoo minoo yo sa zatyíño yo tyiño ra zñin zñin cuhva. Yucuan cuenda nazatyíño yo sihin cuhva sa saha maa ra sii yo. Tatu saha maa ra Ndyoo cuhva sii minoo yo ta cuu cahan yo tuhun saha ra Ndyoo sii yo,

nacahan yo sihin sa ñi ñi yo. Yucuan cuu sa cuu profecía.

⁷ Ta tatu inga yo cuu tyindyee yo sii inga hermano, natyindyee vaha yo. A ra zacuaha, naza-cuaha vaha ra.

⁸ A ra cuu cuhva minoo tuhun vaha sii inga ñiyivi, nacuhva vaha ra tuhun sii ñu. A ra saha xuhun, nacuhva ra cuaha. A ra ndyaca ñaha sii inga hermano, nacundyaca ñaha vaha ra. Ta ra cundahvi ñi sii inga ñiyivi, natyindyee ra sii ñu sihin sa zhi cuñi ra.

Cuhva cuñi si zavaha yo tatu cuenda ra Cristo cuu yo

⁹ Cuhva cuñi ndo sii inga ñiyivi, nakuu si minoo sa ndisa cuii, ta ma zandavi ñaha ndo. Cuñi si vatyí zaña ndo tandihí cuii sa ña vaha, ta zavaha xaan ndo sa vaha.

¹⁰ Cuñi ndo sii minoo ndo ta sii inga ndo tañi yañi ndo. Ta tyaa ndo yahvi tandihí tuhun sa cahan tandihí hermano.

¹¹ Ma cuzusa ndo. Zatyíño xaan ndo tyíño ra Ndyoo.

¹² Cuzhi ñi ndo vatyí sito ndo vatyí cua cundyaa ndo sihin ra Ndyoo ityi nuu ca. Cundyee ñi ndo tatu ndyehe ndo tundoho, ta cahan ndo sihin ra Ndyoo tandihí cuii cuhva.

¹³ Tyindyee ndo sii inga ra yañi yo ñaa sa cumañi sii ra, ta tin cuenda vaha ndo sii ñiyivi saa vehe ndo.

¹⁴ Caca tahvi ndo sii Ndyoo sa cuenda ñiyivi sahñi tahan sihin ndo. Cahan vaha ndo sihin ñu, ta ma cahan ndo ndya vaha ñi sii ñu.

¹⁵ Cuz# iñi ndo sihin ñiyivi z#i cuñi, ta vacu ndo sihin ñiyivi cuihya iñi vatyí tacuan ta cua ndu-ñin ndo.

¹⁶ Ta nacoó sa taxi ñi sihin minoo ndo ta sihin inga ndo. Ma zacahnu ndo sii ndo, ta ma caca iñi ndo vatyí ñiñi xaan ndo. Coó vaha ndo sihin ñiyivi ndahvi vazu ñahñi sa iyo sii ra. Ta ma caca iñi ndo vatyí sito xaan ndo.

¹⁷ Tatu zavaha ñiyivi sa ña vaha sihin ndo, ma zavaha tucu maa ndo sa ña vaha sihin ñu. Zavaha ndo tandihí sa cuu sa vaha sa ndisa, ta cuhva cuan yoñi cuu tyaa cuatyí sata ndo.

¹⁸ Nducu ndo cuhva coo sa taxi ñi sii ndo sihin tandihí cuií ñiyivi tatu cuu.

¹⁹ Cuñi xein sii ndo, ndoho yañi xaa. Tatu zavaha ñiyivi sa ña vaha sihin ndo ma zavaha tucu ndo sa ña vaha sihin ñu. Nacuxaan maa ra Ndyoo sihin ñu tañi catyí si nuu tutu ra: “Yuhvi cui ra cua tasi tuñi sii ñu. Yuhvi cua tyiyahvi”, catyí ra Ndyoo.

²⁰ Zoco tatu sizoco minoo ra cuxaan sii ndo, cuhva ndo sa casi ra. Tatu ityí ra, cuhva ndo ndutyá coho ra vatyí tacuan ta cua cucahan nuu ra ta cua ndundahvi cuñi ra vatyí zavaha ra sa ña vaha sihin ndo.

²¹ Ma zavaha tucu maa ndo sa ña vaha vatyí zavaha ñiyivi sa ña vaha sihin ndo coto cundyaca ñaha sa ña vaha cuan sii ndo. Maa ndo zavaha ndo sa vaha, ta cua zahacanaa ndo sii sa ña vaha cuan.

13

¹ Natyaa tandihí ñiyivi yahvi sii ra cu tyiño vatyí maa ra Ndyoo cuu ra saha tyiño sii ra, ta yucuan cuenda ndyizo ra tyiño.

² Tatu ma tyaa minoo ñiyiví yahvi sii ra cu tyiño, ña tyaa ra yahvi sii Ndyoo. Ta cua tasi tuñi ra Ndyoo ta ra cu tyiño sii ra cuan.

³ Ña zayuhu ra cu tyiño sii ñiyiví zavaha sa vaha. Zayuhu ra sii ñiyiví zavaha sa ña vaha. Tatu yuhu ndo sii ra cu tyiño, cuñi si sa zavaha ndo sa vaha. Ta cua catyi ra vatyí vaha ñiyiví cuu ndo.

⁴ Zatyíño ra cu tyiño sa cuenda ra Ndyoo, ta tacuan ta cuu coo vaha ndo. Zoco tatu cua zavaha ndo sa ña vaha cua yuhu ndo vatyí ndisa cuii cua tasi tuñi ra sii ndo. Zatyíño ra sa cuenda ra Ndyoo, ta yucuan cuenda cua tasi tuñi ra sii ñiyiví zavaha sa ña vaha.

⁵ Yucuan cuenda cuñi si sa tyaa ndo yahvi sii ra sa xihna ñi vatyí yuhu ndo sii ra Ndyoo ta sa cu uu vatyí cuhva cuan catyi sa siñi tuñi vaha sii ndo.

⁶ Tyiyahvi tucu ndo xuhun tatu catyi ra, vatyí zatyíño ra cu tyiño sa cuenda ra Ndyoo. Yucuan cuu tyiño ra.

⁷ Tyiyahvi ndo sii tandihí ra, tandihí sa tahan si sii ra. Tyiyahvi ndo xuhun sa cuenda zicuela. Tyiyahvi ndo xuhun ñuhu sii ra zatyiyahvi sii ndo. Tyaa ndo yahvi sii ra tahan si tyaa ndo yahvi. Ta zacahnu ndo sii ra sa tahan si zacahnu ndo.

⁸ Ma cutavi ndo sii numinoo ñiyiví, zoco cuñi ndo sii minoo ndo ta sii inga ndo. Yoo ra cuñi sii inga ñiyiví sa ndisa cuii, sa zavaha ra tandihí sa catyi tuhun i saha ra Ndyoo sii ra Moisés.

⁹ Vatyí ihya cuu cuhva catyi Tuhun Ndyoo: “Ma cuzu ndo sihin minoo ñaha tatu yiví ñazihí ndo cuu. Ma cahñi ndo ñiyiví. Ma zuhu ndo. Ma ndyiyó iñi ndo sa sii inga ñiyiví.” Tatu tyaa ndo yahvi sa ndisa cuii sii tuhun sa catyi vatyí cuñi ndo sii inga ñiyiví

inuu ñi tañi cuñi ndo sii maa ndo, tatu ndisa cuii tyaa ndo yahvi sii si cuan, sa tyaa ndo yahvi sii tandihí cuii tuhun i saha ra Ndyoo.

¹⁰ Tatu cuñun sii inga ñiyivi ñahñi sa ndya vaha ñi cua zavohon sihin ñu. Sihin sa cuñi yo sii ñu sa ndisa cuii ta sa zavaha yo tandihí sa catyi tuhun i saha ra Ndyoo.

¹¹ Ta inga tucu tuhun catyi sihin ndo vatyi ma naa iñi ndo ñaa cuhva cuu si vityi. Sa tahan si cuhva ndoyo ndo vatyi sa cuyatyí xaan ca quivi cua cacu yo vityi ta ziqui quivi i quisaha sino iñi yo.

¹² Sa cuñi ndihí quivi zavaha ñiyivi sa ña vaha, ta sa cua saa quivi cuzi iñi yo sihin ra Ndyoo. Nazaña yo sa ña vaha sa zavaha yo, ta nazavaha yo tandihí sa vaha tañi zavaha ñiyivi nu ndisi.

¹³ Nazavaha yo sa vaha sa ndisa tañi zavaha ñiyivi ora. Ma zacahnu xaan yo vico ta coho yo ndixi. Ma zavaha yo sa quiñi sihin yoo ñi maa ñaha. Ta ma nducu yo tizihí, ta ma ndyiyo iñi yo sa sii inga ñiyivi.

¹⁴ Zavaha ndo cuhva i zavaha ra Jesucristo, ra ndyaca ñaha sii yo. Ta ma nducu ndo cuhva zavaha ndo ñaa ñi sa ndisi xiñi maa ndo, tandihí sa ña vaha.

14

Ma cahan cuehe ndo sii minoo hermano

¹ Tin cuenda vaha ndo sii tandihí hermano vazu iyo ra ta sino vaha ca iñi ra. Zoco ma natuhun xaan ndo sihin ra sa cuenda cuhva sica iñi ra tatu yivi sa ñiñi xaan cuu si.

² Vatyí iyo ra ñi xaan iñi ra, ta catyi ra vatyí cuu casi ra tandihi. Zoco inga ra, tañaha ca sino vaha iñi ra, ta sasi ra maa maa yucu ñi.

³ Ra sasi tandihi, ña vaha cua catyi ra vatyí ñahñi maa sa sito inga ra sa ma casi cuan. Ta ra sa ma casi cuan, ña vaha cua catyi maa ra vatyí ña vaha ra sa tuhva sasi tandihi vatyí zuun ñi maa ra Ndyoo i tñin cuenda sii ra cuan.

⁴ Ñahñi cuhva iyo suun sa catyun vatyí ña vaha cuhva zavaha inga ra. Maa ra Ndyoo cuu ra ndyaca ñaha sii ra cuan, ta cua catyi maa ra tatu vaha a ña vaha sa zavaha muzu ra. Ta cua tyindyee ra Ndyoo sii ra, ta cua cuu zavaha ra sa vaha.

⁵ Iyo yo sica iñi yo vatyí ñiñi ca minoo quivi ta ziqui inga. Ta inga yo sica iñi yo vatyí inuu ñi cuu tandihi quivi. Nacaca iñi minoo minoo yo cuhva cuñi yo, ta ma ndu-uu iñi yo.

⁶ Ra zacahnu minoo quivi, zacahnu ra sii si sa cuenda ra Ndyoo. Ta ra tuhva sasi tandihi, zavaha ra tacuan sa cuenda ra Ndyoo vatyí saha ra tyahvi ndyoo sii ra. Ta ra sa ma casi tandihi, sa cuenda ra Ndyoo ta ma casi ra vatyí sica iñi ra vatyí ña vaha, ta saha ra tyahvi ndyoo sii ra Ndyoo.

⁷ Yoñi yo ta ndito yo vatyí cuñi yo. Ta yoñi yo cuu quivi cuñi maa yo.

⁸ Tatu ndito yo, ndito yo sa cuenda maa ra Jesús. A tatu cuu yo, cua cuu yo vatyí maa ra catyi, vatyí maa ra ndyaca ñaha sii yo. Vazu ndito yo a vazu cuu yo, zoco cuenda ra Jesús iyo yo

⁹ vatyí yucuan cuenda i sihi ra Cristo, ta i nandoto tucu ra vatyí cua cuu ra ra ndyaca ñaha sii ñiyivi sa sihi ta sii ñiyivi ndito.

10 Ta yoho ¿ña cuenda catyun vatyi ña vaha cuhva zavaha inga hermano? Ña vaha cua catyi ndo vatyi ña vaha ra vatyi maa ra Ndyoo cuu ra cua tasi tuñi sii sa minoo minoo yo.

11 Vatyi catyi Tuhun ra Ndyoo:
Sa ndisa cuii cuu si vatyi ndite.
Ta zuun ñi sa ndisa cuu si vatyi cua cuiñi siti tandihí cuii ñiyiví nui.

Ta cua zacahnu tandihí ñu sii sihin yuhu ñu.

12 Tacuan ta tandihí yo cua catyi yo sihin ra tandihí sa i zavaha yo.

Ma zandoyo ñuhu ndo sii inga hermano

13 Yucuan cuenda ma catyi ca yo vatyi ña vaha sa zavaha inga hermano ñaa ñi maa cuhva sa ndyico ra. Zoco nananducu yo cuhva ta ñahñi cua zavaha maa yo sa cua zandoyo ñuhu si sii minoo yañi yo.

14 Iyo minoo cuhva i zañaha ra Jesús sii, ta yucuan cuenda site vatyi ñahñi sa ma cuu casi yo. Zoco tatu iyo minoo hermano ta sica iñi ra vatyi iyo minoo sa ma cuu casi yo tatu tyaa yo yahvi sii ra Ndyoo, sa cuenda maa ra cuan ta ña vaha tatu casi ra.

15 Vatyí tatu sa cuenda sa tuhva yo sasi ta zativí yo sii minoo hermano, ña iyo ca yo cuhva cuñi ra Ndyoo cuhva cuan. Ta ña cuñi yo sii yañi yo tatu zavaha yo minoo cuhva ta sica iñi ra vatyí ña vaha si ta cuu zativí si sii ra.

16 Vazu yiví cuatyí cuu minoo cuhva sa zavaha yo, zoco tatu cahan ñiyiví sa cuenda si, vaha ca ma zavaha yo sii si.

17 Vatyí tatu ndyaca ñaha ra Ndyoo sii yo, ña ñiñi xaan ñaa sa casi yo a ma casi yo a sa coho yo a sa ma

coho yo. Zoco ñiñi xaan cuu yo ñiyivi vaha xaan ta coo sa taxi sii yo sihin ra Ndyoo ta sihin ñiyivi ta coo sa zii sii yo sa cuenda Tatyí Li sa iyo sihin yo.

¹⁸ Tatu tacuan iyo yo ta zatyíño yo sa cuenda ra Cristo, zii cua cuñi ra Ndyoo ndyehe ra sii yo ta zii cua cuñi tucu ñiyivi.

¹⁹ Yucuan cuenda nanducu yo cuhva coo sa taxi sii yo sihin ñiyivi tandihi saha, ta natyindyee yo sii tahan yo, ta ziqui cua cuu ca zacuu tandihi yo cuhva cuñi ra Ndyoo.

²⁰ Ma zativí ndo tyiño ra Ndyoo sa cuenda sa sasi ndo. Ndisa vatyi ñahñi sa ica, ta cuu casi yo tandihi, zoco ña vaha tatu casi yo tatu cua zandoyo ñuhu si sii minoo hermano.

²¹ Vaha ca sa ma casi yo coño ta ma coho yo ndixi ta ma zavaha yo ñaa ca sa cuu si tatu zandoyo ñuhu si sii minoo yañi yo ta ma sino vaha ca iñi ra.

²² Tatu sica iñun vatyi cuu casun tandihi, vaha. Zoco ma cohon tuhun cuan sihin inga hermano sa sica iñi inga cuhva. Cohon maa ñi sihin ra Ndyoo sa cuenda si. Zii xaan cua cuñi yo tatu sito yo vatyi ñahñi sa ña vaha zavaha yo.

²³ Zoco tatu ndu-uu iñi yo ta ña sito yo tatu vaha a ña vaha tatu casi yo, zativí si sii yo sa tacuan vatyi ña ñi iñi yo ta sasi yo. Ta ñaa ñi maa sa zavaha yo ta ña sito yo tatu vaha a ña vaha si, cuatyi cuu si.

15

Nazavaha yo ñaa sa cua tahan iñi inga hermano

¹ Maa yo sa sino vaha iñi, cuñi si sa cundyee iñi yo sihin inga hermano tatu tañaha ca sino vaha iñi ra. Ta ma zavaha yo maa ñi cuhva cuñi maa yo.

² Nanducu yo cuhva zavaha yo sa cua tahan iñi inga hermano, ñaa sa cua tyindyee sii ra ta cuu ra ñiyivi vaha ta sino vaha iñi ra sii ra Ndyoo.

³ Vatyí ndya ra Cristo, ta ñá zavaha ra sa cuñi maa ra. I zavaha ra cuhva cuñi ra Ndyoo. Ta i ndyehe xaan ra tundoho tañi catyi si nuu tutu ra Ndyoo: “Cahan ñiyivi ndya vaha ñi suun, ta tañi sii mi cahan ñu cuu si”, catyi si.

⁴ Ta tandihi sa i tyaa ra tyaa Tuhun Ndyoo ta sa naha, i sicundyaa si vatyí cua zacuahá si sii yo ta cua sino xaan iñi yo ta coo tundyee iñi sii yo. Ta zii cua cuñi yo vatyí cua cahvi yo sii si ta coto yo vatyí cua cuhva ra Ndyoo sa vaha sii yo sa ndisa.

⁵ Saha maa ra Ndyoo tundyee iñi sii yo ta minoo cuhva sa ma nducuihya xaan iñi yo. Sino iñi tandihi ndo vatyí ra Jesús cuu ra ndyaca ñaha sii ndo, yucuan cuenda nacuhva maa ra Ndyoo cuhva sii ndo sa coo sa taxi sihin minoo ndo ta inga ndo, ta cua ndu-iiñ ndo sa ndisa cuii.

⁶ Vatyí tacuan ta iiñ ñi cuhva cua caca iñi ndo, ta iiñ ñi tañi minoo ñi nduzu cua zacahnu ndo sii ra Ndyoo Zutu ra Cristo Jesús, ra ndyaca ñaha sii yo.

Cua cuiñi ñiyivi sa yivi ñiyivi hebreo cuu Tuhun Ndyoo

⁷ Tiin cuenda vaha ndo sii minoo ndo ta sii inga ndo tañi i tiin cuenda ra Cristo sii ndo vatyí cuhva cuan zacahnu si sii ra Ndyoo.

⁸ Ta catyi sihin ndo vatyí ra Cristo cuu ra tyindyee sii ñiyivi hebreo, ta cuhva cuan zañaha ra vatyí ndisa cuii maa ra Ndyoo vatyí ra Cristo cuu ra i catyi ra Ndyoo sihin ñiyivi sahnu sii yo vatyí cua quisi ra.

⁹ (Ta i quisi tyindyee tucu ra Cristo sii ñiyivi sa yivi ñiyivi hebreo cuu), ta tacuan ta cuu zacahnu tucu ñu cuan sii ra Ndyoo vaty i cundahvi iñi ra sii ñu tañi catyi si nuu tutu ra:
Yucuan cuenda cua zacahni suun nu iyo inga ñiyivi.

Cua cate yaa, ta zacahni zivun.

Caty i si.

¹⁰ Ta inga tucu saha catyi ra:

Cuzi iñi ndo, ndoho sa yivi ñiyivi hebreo cuu.

Cuzi iñi ndo in ñi sihin ñiyivi ra Ndyoo.

¹¹ Ta iyo inga nu catyi si tyehen:

Zacahnu ndo sii ra ndyaca ñaha sii yo, ndoho sa yivi ñiyivi hebreo cuu.

Ta nazacahnu tandi ñiyivi sii ra.

¹² Ta iyo tucu nu cahan ra Isaías ta catyi ra:

Cua cacu minoo ñiyivi ra Isaí.

Cua quisi ra vaty cua cundyaca ñaha ra sii ñiyivi sa yivi ñiyivi hebreo cuu.

Ta sa cuenda maa ra ta cua coo cuhva cacu ñu.

¹³ Tyindyee maa ra Ndyoo sii yo, ta sito yo vaty sa ndisa cua cuhva ra sa vaha sii yo. Sihin cuhva saha maa Taty i si sii ndo ta cua sino xaan iñi ndo sii ra. Ta vityi sa cuenda sa sino iñi ndo sii ra ta zii xaan cua cuñi ndo, ta cua coo sa taxi sii ndo sihin ra.

¹⁴ Ta sito vehi sa cuenda maa ndo hermanos vaty vaha xaan ndo, ta sito ndo cuaha xaan, ta cuu cuhva ndo minoo sa siñi tuñi vaha sii minoo ndo ta sii inga ndo.

¹⁵ Zoco vazu sa site cuhva cuan zoco zuun ñi i tyei zuhva tuhun ya, ta ñihi xaan i quehin sihin ndo, ta zanacohin iñi ndo inga saha zuun ñi cuhva

sa i nacatyí sihin ndo. Vatyí maa ra Ndyoo i saha tyiño sii, sa zatyíñe tyiño maa ra.

¹⁶ Ta i nduí minoo ra zatyíño sa cuenda ra Jesucristo nu iyo ñiyívi sa yívi ñiyívi hebreo cuu. Nacatyí xein Tuhun ra Ndyoo vatyí zacahnu si sii ra cuhva cuan. Ta cua sino iñi ñu cuan, ta cua cuu cuhve sii ñu sii ra Ndyoo. Ta cua tñn cuenda ra sii ñu vatyí sa zanduvaha Tatyí Ii sii ñu.

¹⁷ Tyindyee xaan ra Cristo Jesús sii, ta yucuan cuenda cuu catyí vatyí vaha xaan cuu tyiño i zavehi sa cuenda ra Ndyoo.

¹⁸ Ma cuu catyí inga cuhva vatyí maa ra Cristo i sityiño sii, ta sa cuenda maa ra ta ñihi cuhva ta i sino iñi ñiyívi sa yívi ñiyívi hebreo cuu. I siñi ñu tuhun quehin, ta i ndyehe ñu cuhva zavehi

¹⁹ vatyí i zavehi sa ndyityi ta cuaha xaan cuhva sihin tundyee iñi sa saha maa Tatyí Ii maa ra. Ta ndya cuhva ndya ñuu Jerusalén ta ndya ñuu Ilírico i zacoto vehi tandihí Tuhun Vaha sa cuenda ra Cristo.

²⁰ Ta i nducu xein cuhva zacote Tuhun Vaha nu ña sito ñiyívi sii ra Cristo vatyí ña cuñi zatyíñe nu i quisaha inga ra sa xihna ñi.

²¹ Vatyí catyí si nuu tutu ra Ndyoo:
Cua coto ñiyívi, ñu tañaha ca coto, sa cuenda ra.
Ta ñiyívi tañaha ca cuiñi, cua cutuñi iñi ñu,
catyí si.

Cuñi ra Pablo cuhun ra ñuu Roma

²² Yucuan cuenda ñá cuu quisi nu yucu ndo.

²³ Zoco vityi sa ndihí zatyíñe ityi ya, ta cuñi xein quisi ndyehí sii ndo. Sa cuaha cuiya cuñi quisi nu yucu ndo.

24 Yucuan cuenda sica iñi vatyí cua ndyehi sii ndo qui^ví cua cuhin ñuu España. Cua ndoi sihin ndo zuhva qui^ví, ta ziquí cua cuu tyindyee ndo sii zuhva, ta cua cuu cuhin ityi nuu ca.

25 Zoco vityi cuahan xihne ñuu Jerusalén vatyí cua tyindyeyi sii ñiy^ví sino iñi Tuhun Ndyoo yucuan.

26 Vatyí i saha maa ñiy^ví ñuu Macedonia ta ñuu Acaya xuhun sa tyindyee sii ñu ndahvi sino iñi sii ra Jesús ñuu Jerusalén.

27 Vaha xaan sa cuñi ñu tyindyee ñu, ta cuhva cuan cuñi si, vatyí sa xihna ñi i tyindyee ñiy^ví hebreo sii ñu cuan sihin sa zacoto maa ra Ndyoo sii ñu, ta i sito ñu yozo caa iyo ra Ndyoo.

28 Yucuan cuenda xihna ca cundyaque xuhun sa tyindyee ñiy^ví sii ñu ñuu Jerusalén. Ta ziquí cua yehi nu yucu ndo ityi cuhin ñuu España.

29 Ta sa site vatyí cua cuhva xaan ra Cristo sa vaha sii ta sii maa ndo qui^ví cua sei nu yucu ndo.

30 Cuñi xaan ndo sii ra Jesucristo, ndoho yañi xaa. Ta saha xaan Tatyí lí cuhva sii ndo sa cuñi ndo sii inga ñiy^ví sino iñi. Yucuan cuenda vityi zañiñi sii ndo vatyí cahan xaan ndo sihin ra Ndyoo sa cuenda mi.

31 Caca ndo sii ra vatyí cua zacacu ra sii, sii ñiy^ví ña tyaa yahvi sii ra ityi Judea. Ta caca ndo sii ra vatyí cua cuz^h iñi ñiy^ví ñuu Jerusalén sihin sa cua cuhve sii ñu.

32 Ta caca ndo sii ra Ndyoo vatyí cua cuu quisi sihin sa z^h cuñi nu ndyaa ndo tatu tacuan cuñi maa ra Ndyoo. Ta caca ndo sii ra vatyí cua cuu quitati zuhva nu ndyaa ndo ta cua coo ca tundyee

iñi sii sa cuenda Tuhun Ndyoo ta sa cuenda coño ñuhi.

³³ Ta vityi, Ndyoo cua ndoo xaan sihin ndo. Ta nacuhva xaan ra sa coo sa taxi sii ndo sihin ra ta sa coo vaha ndo tandihí cuhva. Ta nacuu si tacuan.

16

Zacuhun ra Pablo minoo nacumi sii amigo ra

¹ Zacote sii ndo sa cuenda ña hermana Febe ya. Tyindyee xaan ña sii ñiyiví sino iñi Tuhun Ndyoo ñuu Cencrea.

² Ta catyi sihin ndo vatyi tñin cuenda vaha ndo sii ña vatyi ñin ñi cuu ña sihin ndo sa cuenda ra Cristo, ra ndyaca ñaha sii yo. Tñin cuenda vaha ndo sii ña minoo cuhva vaha tañi tahan si zavaha ñiyiví ra Ndyoo. Ta tyindyee ndo sii ña ñaa sa cumañi sii ña vatyi i tyindyee maa ña sii cuaha xaan ñiyiví. Ta sii tucu mi i tyindyee ña, ndihí ca.

³ Cuhva ndo minoo nacumi sii ña Priscila ta ra Aquila. ñin ñi zatyíño ñu tyíño ra Cristo sihin.

⁴ Sa yatyi cuu ñu minoo saha nu i zacacu ñu sii. Saha xein tyahvi ndyoo sii ñu, ta tacuan tucu zavaha tandihí ñiyiví sino iñi. Ñiyiví sa yiví ñiyiví hebreo cuu, saha xaan ñu tyahvi ndyoo sii ñu.

⁵ Sa cuenda mi cuhva tucu ndo minoo nacumi sii ñiyiví sino iñi tuhun vaha, ñu titahan vehe ña Priscila. Ta sii ra sa nañi Epeneto. Ñoho xaan iñi sii ra. Maa ra cuu ra sino iñi sii ra Cristo sa xihna ñi ityi Asia.

⁶ Cuhva ndo minoo nacumi sii ña María. I zatyíño xaan ña sa cuenda ndo.

⁷ Cuhva ndo minoo nacumi sii ra Andrónico ta ra Junias. ñin ñi ñuu ra sihin ñuu mi. Ta i siñoho tucu ra vehe caa sihin. Ta xihna ca nduu tahan maa ra

i sino iñi ta ziqui mi. I zacuhun ra Jesucristo sii nduu tahan ra sihin tyiño ra. Ta tyaa xaan ñiyivi yahvi sii ra.

⁸ Cuhva ndo minoo nacumi sii ra Amplias. Ñoho xaan iñi sii ra sa cuenda ra Cristo.

⁹ Cuhva ndo minoo nacumi sii ra Estaquis. Ñoho xaan iñi sii ra. Ta tacuan tucu ra Urbano. I zatyño xaan ra sihin ndi sa cuenda ra Cristo.

¹⁰ Cuhva ndo minoo nacumi sii ra Apeles. Sino xaan iñi ra sii ra Cristo vazu ndyehe ra tundoho. Cuhva ndo minoo nacumi sii ñiyivi ra Aristóbulo.

¹¹ Cuhva ndo minoo nacumi sii ra Herodión. In ñi ñuu ndi. Cuhva ndo minoo nacumi sii ñiyivi sino iñi vehe ra Narciso.

¹² Cuhva ndo minoo nacumi sii ña Trifena ta ña Trifosa. Zatyño ñu tyiño ra Cristo, ra ndyaca ñaha sii yo. Ta kuhva ndo minoo nacumi sii ña Pérsida, ña kuhva yo. Ñihi xaan i zatyño ña tyiño ra Ndyoo.

¹³ Cuhva ndo minoo nacumi sii ra Rufo ta sii zihí ra. Vaha xaan sino iñi ra sii ra Jesús. Ta zihí ra cuu tañi zihí mi.

¹⁴ Cuhva ndo minoo nacumi sii ra Asíncrito, ra Flegonte, ra Hermas, ra Patrobas, ra Hermes, ta inga ra yañi yo sa yucu sihin ra.

¹⁵ Cuhva ndo minoo nacumi sii ra Filólogo ta sii ña Julia ta sii ra Nereo sihin kuhva ra ta sii ra Olimpas ta sii tandihí inga ñiyivi sino iñi sa yucu sihin ñu.

¹⁶ Cuhva xaan ndo ndyoo nacucumi sii minoo ndo ta sii inga ndo. Tandihí ñiyivi cuenda ra Cristo zaquisi ñu minoo nacumi sii ndo.

¹⁷ Vityi zañiñi sii ndo yañi xaa vatyi zaha vaha ndo cuenda yoo cuu ñiyivi zacahñi tahan sii ñiyivi sino iñi. Zativí ñu kuhva sino iñi ñiyivi sihin minoo

cuhva ña tuhva maa ndo zavaha. Ma cutahan ndo sihin ñu zavaha tacuan, ta ma zavaha ndo cuhva catyi ñu

¹⁸ vatyí ñu zavaha tacuan, ña zatyiño ñu tyiño ra Cristo ra ndyaca ñaha sii yo. Zatyíño ñu cuhva cuñi maa ñu. Vaha xaan ta vii xaan cahan ñu, ta zandavi ñaha ñu sii ñiyivi ña sito vaha.

¹⁹ Sito tandihí ñiyivi vatyí tyaa xaan ndo yahvi Tuhun Ndyoo. Yucuan cuenda zii xaan cuñi sihin ndo, zoco cuñi sa cua zacuenda vaha ndo sii ndo ta zavaha ndo maa ñi sa vaha. Ta ma cutuhva ndo zavaha ndo sa ña vaha.

²⁰ Ra Ndyoo cuu ra saha sa coo sa taxi sii ndo, ta ña naha ca ta cua zandihí ra sa ña vaha nu yucu ndo. Cua cuhva ra sa cuañi ndo ziqui cuihna. Ta vityi nadoo xaan sa vaha sa saha maa ra Jesucristo sii ndo. Maa ra ndyaca ñaha sii yo.

²¹ Zaquisi ra Timoteo minoo nacumi sii ndo. Zatyíño ra sihin. Ta ra Lucio ta ra Jasón ta ra Sosípater zaquisi tucu ra minoo nacumi sii ndo. ñin ñi ñuu tandihí ra sihin ñuu mi.

²² Yuhvi ra Tercio tyei carta ya, ta zaquisi minoo nacumi sii ndo sa cuenda ra ndyaca ñaha sii yo.

²³ Zaquisi maa ra Gayo minoo nacumi sii ndo. Saha noo ra vehe ra sii, ta ndu-ñin tucu tandihí ñu sino iñi ihya. Zaquisi ra Erasto minoo nacumi sii ndo sihin ra Cuarto yañi yo. Ra Erasto cuu ra cumi xuhun ñuu ya.

²⁴ Cuñi vatyí cua cuhva xaan ra Jesucristo, ra ndyaca ñaha sii yo, sa vaha sii tandihí ndo. Ta nacuu si tacuan.

Zacahnu ra sii ra Ndyoo nu ndihí tyaa ra carta ya

²⁵ Zacahnu ndo sii ra Ndyoo vatyí maa ra cuu ra cua cuhva tundyee iñi sii ndo, ta ma ndoyo ñuhu ndo sihin tuhun vaha sa i zacote sii ndo sa cuenda ra Jesucristo. Ta i zacoto ra Ndyoo sii ndo tuhun vaha cuhva iyo ra. Ta sa naha ñá sito ñiyiví tuhun sa cuenda ra Cristo, zoco vityí sito ñu.

²⁶ Vityí sito ñu tuhun sa cuenda ra Cristo. Saha ra Ndyoo tyiño sa cua coto tandihí ñiyiví ñuu ñiyiví, ta cua cutuñi iñi ñu sa i tyaa ra profeta ta sa naha. Maa ra Ndyoo tava tyiño ya, ta ndito ra tandihí cuii tyiemvu. Ta vityí sa cuenda sa sito ñiyiví, ta cuu sino iñi tandihí ñu, ta cuu tyaa ñu yahví sii ra.

²⁷ Maa ñi maa ra cuu Ndyoo. Maa ñi maa ra cuu ra iyo sa siñi tuñi sa ndisa. Nazacahnu yo sii ra sa cuenda sa i zavaha ra Jesucristo. Nazacahnu yo sii ra tandihí cuii tyiemvu. Ta nacuu si tacuan.

Tuhun Ndyoo sihin tyehen ñi
New Testament in Mixtec, Chayuco (MX:mih:Mixtec,
Chayuco)

copyright © 1979 Wycliffe Bible Translators, Inc.

Language: Mixtec, Chayuco

Translation by: Wycliffe Bible Translators, Inc.

Mixteco, Chayuco [mih], Mexico

Copyright Information

© 1979, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Chayuco

© 1979, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

4924062e-6bf2-54cb-87ed-9874f41e7991